



ԳԵՈՐԳ ԲԱՇԻՆՉԱԳԵԱՆ

82.

75 (17. 9. 25) [Բաշինչագեան]

Բ-27


# ՆԿԱՐՉԻ ԿԵԱՆՔԻՑ

(ՅԻՇՈՂՈՒԹԻՒՆՆԵՐ)



Ս. ՊԵՏԵՐՐՈՒՐԳ  
ԳՐԱԴԱՐԱՆԱՆ ՏՊԱՐԱՆ

1903




30/iii 29.  
Մարտի 30 1888  
Ն Կ Ա Ր Չ Ի Կ Ե Ա Ն Ք Ի Ց

(ՅԻՆՈՂՈՒԹԻՆՆԵՐ) \*

I

Պետերբուրգի Գեղարուեստների Ակադեմիայի  
քոլոր ուսանողները սրտատրոփ սպասում են դարնան  
սկզբին: Նրանցից ամեն մէկը անց է կացնում ձմե-  
ռը շատ ախուր: Լինելով գլխաւորապէս հարաւային  
հեռու կամ մօտիկ տեղերից, կասկած չկայ, որ  
մայրաքաղաքի մութ ու խոնաւ օդը, մանաւանդ  
գեղեցիկ բնութեան բացակայութիւնը, ծնշում է  
նրանց սրտերը: Շատ յաճախ լսվում է նրանց բե-  
րանից, թէ արդեօք ե՞րբ պէտք է վերջանայ այս ան-  
պիտան ձմեռը, ե՞րբ կըտեսնենք լոյս... Ո՛հ, ի՞նչ հրա-  
շալի բան է հարաւային արեգակը, կապոյտ երկին-  
քը, դաշտերն ու բլուրները, սարերն ու ձորերը...  
Ընդհանրապէս հիւսիսային ձմեռը ձանձրացուցիչ է  
իւրաքանչիւր ուսանողի համար, բայց դա այնքան

\*) Լոյս են տեսել «Մշակի» համարներում, կտոր-  
կտոր, միքանի տարուայ ընթացքում, 1888 թուից:



զգալի չի լինում պատմարանների, ժանրիստների, բատալիստների և պօրտրետիստների համար, որքան պէյզաժիստների— բնութեան հարազատ զաւակների համար, որոնց կեանքին է վերաբերում և մեր խօսքերը: Գալիս է գարունը, վերջանում են քննութիւնները՝ աչոյ կամ անաչոյ, բայց այդ միւսնոյն է նրանց յոյսը մեծ է, նրանք հաւատում են իրանց տաղանդին Երջանիկ օրեր: Բոլորեքեան շտապում են վերադառնալ հայրենիք, ուր արդէն ծաղկում է բնութիւնը: Նրանց առաջին գործը լինում է ձեռք բերել նկարչական բոլոր պիտոյքները՝ ներկեր, վրձիններ, պաստառ, էտիւդարան (ճանապարհորդական արկղ), թուղթ, մատիտներ, հովանի և աթոռ: Սյդ բոլորը պատրաստելուց յետոյ ուղեորւում են հայրենիք:

Ես էլ այդպիսիներից էի:

1883 թ. մայիսի սկզբներին, վերջին հրաժեշտ տալով Պետերբուրգին, եռանդով և յոյսերով լի՝ վերադարձայ հայրենիքս— Սղնախ, ուր անց էի կացրել մանկութիւնս ու պատանեկութիւնս: Ծնողներս այլևս չկային, տնից ու տեղից նոյնպէս զրկուել էի, բայց հայրենիքիս սէրը մնացել էր իմ մէջ անխախտ...

Տեղ հասնելու պէս պատրաստեցի նկարչութեան

բոլոր գործիքներս՝ պաստառի փոքրիկ կտորների վրայ էտիւղներ և էսկիզներ նկարելու համար: Արդէն միւս օրը լուսադէմին դիմում էի դէպի քաղաքի արևելեան ծայրը՝ Ալաղանի դաշտավայրը, նկարելու նպատակով:

Նկարիչները, չնայելով որ անդադար հետազոտում են բնութիւնը, ուսումնասիրում են նրա զանազան երևոյթներն ու գաղտնիքները, ստանում են տպաւորութիւններ, միևնոյն ժամանակ էսկիզներ ու էտիւղներ էլ են շինում, այսինքն բնութիւնից ճիշտ պօրտրէտներ են հանում: Իսկ ձմեռը փակուած արհեստանոցներում, երևակայութեամբ պատկերացնում են իրանց առաջ այս կամ այն տեսարանը, լուսաւորութիւնը, մօմէնտը և այլն, երբեմն էլ նայում են պատերի վրայ շարած էտիւղներին, նորոգում տպաւորութիւնները և այս բոլորից յետոյ արտադրում են պատկերներ...

\*

Գարնանային առաւօտ է: Սղնախից դուրս մի բարձրաւանդակի վրայ կանգնած՝ նայում եմ դէպի արևելք, ուր անհուն տարածութեան մէջ, Կովկասեան լեռնաշղթայի ետեւից նկատելի է մի շերտաւոր

գունաւոր փայլ, որ հորիզոնից բարձր կիսաշրջան  
կազմելով, աստիճանաբար միախառնուում է հաղիւ  
նշմարելի մանիշակագոյն երկնքի հետ:

«Արեւը շուտով կը ծագի», մտածեցի ես:

Դաշտավայրն ընկղմուած է խոր քնի մէջ, ծած-  
ուած մոխրագոյն թանձր մառախուղով: Դա յիշեց-  
նում է ինձ ծովը. և իրաւ սյնքան նման է ծովին,  
որ անձանօթը հեշտութեամբ կը սխալուի: Երկինքը  
պարզ է և խաղաղ. բնութեան մէջ լռութիւն է  
տիրում:

Փայլը փոքր առ փոքր ընդարձակուելով երկ-  
նակամարի վրայ, օսկեղոյնի է փոխուել: Թռչունների  
երամբ՝ սև դծի զանազան ձևեր ընդունելով, սլա-  
նում է ընդարձակ հովտի վրայով՝ մերթ բարձրա-  
նում զէպի երկինք, մերթ իջնում ու խորասուղ-  
ւում մշուշի մէջ: Լեռների ձիւնապատ գագաթների  
քամակից փայլն արդէն անհետացել է և տեղի տուել  
բոցավառ արեին, որ ցոյց տալով զէմքը՝ սփռել է  
իր տակ օսկեփայլ փոշի: Բոլոր բարձրաւանդակնե-  
րը, ուր մերկ ժայռերի կամ կանաչաղարդ լեռների  
վրայ գտնուում են կիսաքանդ պարիսպներ, սրբավայ-  
րեր, հին աւերակներ ու գերեզմանատունը, ներ-  
կուել են զանազան կարմրախառն զոյներով: Թէպէտ  
մառախուղը դեռ ևս թանձր է և անշարժ, սակայն



նրա միջից այստեղ ու այնտեղ հսկայական ընկուզե-  
նիններն ու բարդիները խրոխտ կերպով դուրս են  
ցցել իրանց մոյզ կանաչագոյն գազաթները՝ կարծես  
արևածագը տեսնելու համար: Արեգակը դանդաղու-  
թեամբ բարձրանալով, գունատում և հետզհետե՛  
փոքրանում է, տալով երկնքին պարզ կապուտակ  
երանգ: Ոսկեփայլ փոշին այժմ արծաթի է փոխւում  
և ընդարձակւում լեռան ստորոտներում: Մառախու-  
ղը արթնանում-շարժւում է համեստութեամբ և  
գոլորշիանալով դիմում է դէպի երկինք՝ անշտապ և  
անվրդով: Նա հասնում է լուսատուին ու թափան-  
ցիկ քողով ծածկում նրա դէմքը՝ քնքոյշ ստուեր  
ձգելով երկրի վրայ: Տեսարանն աւելի կախարդիչ ու  
խորհրդաւոր է դառնում: Լուսթիւնը շարունակւում  
է: Լուսատուն երկար չի համբերում քողի տակ,  
երբեմն ցոյց է տալիս իր դէմքը, մի վայրկեան  
պայծառացնում է բնութեան հրաշալիքը և դարձեալ  
ծածկւում քողի տակ: Մշուշը ջերմութիւն զգալով  
շարունակւում է բարձրանալ, արագացնելով քայլերը,  
իսկ երկնքի կապուտակի վրայ գոյանում են բարակ-  
ծերմակ ամպեր: Ծովն այլևս չկայ: Դաշտավայրն իր  
անվերջ տարածութեամբ փռուած է առաջ, որի  
սահմանը լեռնաշղթան է և որի երկու ծայրերը  
հեռանալով միախառնւում են օդի հետ ու կորցնում

իրանց ձևն ու գոյնը և այդպիսով անտեսանելի դառնում:

«Բաւական է» մըմնջում եմ ես, «արանից աւելի ընդարձակ տեսարան չէ կարող լինել և ցանկալի էլ չէ»: Այն բարձրաւանդակի ստորոտում, որտեղ կանգնած եմ ես, երևում են շինական աղքատիկ խրճիթներ, թաղուած փարթամ բուսականութեան մէջ: Միջանի տեղից ծուխ է բարձրանում: Գիւղերի և այգիների սահմանները վերջանում են ալիքաձև գծերով, իսկ դաշտը, զարգարուած քառանկիւնի գոյնգոյն անթիւ գորգերով, շարունակւում է ու անհետանում հեռւում, ուր անխռով և հեղանազ հոսում է Ալազանը ոլոր-մոլոր պտոյաններով: Այս գետը միմեանցից բաժանում է բնութեան երկու տարրեր՝ գեղեցկութիւնները — հարթ դաշտավայրը ձիաուրի խիտ անտառից: Հովտի վրայ փռուած երփներանգ գորգերի հետ ներդաշնակում են անձրևներից գոյացած ձաճիճները, որոնց մէջ երկինքը ցոյց է տուել իր դէմքը, իսկ միջանի տեղ նրանք բոցավառւում են արևի ձառագայթների անպրադառնալուց: Ծառերի և թփերի մանր ու խոշոր՝ ցիրուցան արած խմբերը լրացնում են տեսարանի շքեղութիւնը: Ձիաուրի անտառը դտնուելով դաշտի միւնոյն մակերևոյթի վրայ՝ տարածւում է մինչև Կով-

կասեան լեռնաշղթայի ստորոտները: Այս աննկարագրելի հեռաւորութեան մէջ մեծաքանակ օդի ծալքերը խլել են ամբողջ տեսարանից յատուկ դոյները, պարզւելով նրանց փոխարէն թանձր կապոյտ քօղ: Կուսական սրբութիւնն ու վսեմութիւնը տիրում է ամեն տեղ: Արեգակը շարունակում է բարձրանալ, աստիճանաբար տաքացնելով օդը և կարծացնելով ծառերից ընկած ստուերները:

Բնութեան այս վեհութիւնը կաշկանդել է ինձ, անձնաւորութիւնս սաստիկ աննշան է թւում իմ աչքին:

(«Որքան չնչին արարած է մարդս») արտասանում եմ հազիւ լսելի ձայնով...

\*

Ես գնացել էի արեւածագը նկարելու նպատակով, բայց բնութեան հրաշալիքը այն աստիճան ազդեց ինձ վրայ, որ ամեն բան մոռացայ: Իմ կեանքում միեւնոյն բանը կրկնուել է յաճախ և կրկնւում է այժմ էլ: Նախապատրաստուած գնում եմ որոշած կողմը էտիւդ նկարելու, բայց երբ հասնում եմ ցանկացած տեղը, երբ իմ առաջ բացւում է սքանչելի տեսարանը, ես այլևս անկարող եմ լինում վրձին շարժելու, նայում եմ ապշած և չեմ կշտանում. .

Վերջապէս վերադառնում եմ տուն դադարի ձեռքով...

Սահասարակ կարծում են, թէ այն պատկերները, որ նկարիչները դնում են ի ցոյց հասարակութեան, նկարուած են հէնց այն օրը, նոյն իսկ այն ժամում, ինչ օրը կամ ինչ ժամը որ ներկայացնում է պատկերը: Այդ կարծիքը սխալ է: Ընդհակառակն՝ երբ նկարիչը գտնւում է բնութեան զրկում, ուր անվերջ զեղեցիկ տեսարաններ և զմայլեցուցիչ մօմենտներ են նրան շրջապատում, այն ժամանակ նա անզօր է գտնւում բնութիւնից որևէ կտար ընդօրինակելու: Բայց միևնոյն նկարիչը, երբ կորցնում է աչքի առջևից այդ ամենը, երբ հասնում է ձմեռը և ոչնչացնում բնութեան զարդարանքները և երբ նա՝ փակուած իւր արհեստանոցում, հրձուանքով յիշում-մտարերում է իւր տեսածները, որոնց այլևս չէ կարողանում տեսնել, այն ժամանակ միայն նա զիմում է վրձինի օգնութեան և աշխատում արտայայտել իւր սրտի ցանկութիւնները:

Հէնց այդ տեսակ պայմանների մէջ նկարուած պատկերներն են լինում մտքի, զգացմունքների և բուռն ոգևորութեան ծնունդ և միմիայն այդ տեսակ զօրծերը կարող են տպաւորութիւն գործել նայողի վրայ...

«Վերջապէս մի բան պէտք է նկարել», մտածեցի  
ևս և քայլերս ուղղեցի դէպի ոչ-հեռու զանուկոյ  
այգիները: Նրանցից մէկի դուռը բաց էր. մտայ,  
չրջեցի. ոչ ոք չկար, այգեպանն չէր երևում: Սյդու  
մէջտեղը, մի փոքրիկ հրապարակի վրայ, ուր գիշե-  
րուան ցօղով ծածկուած թարմ խոտերն ու գոյնը-  
գոյն ծաղիկները թեքել էին իրանց մանրիկ զլինե-  
րը, կանգնած էր յարդով ծածկուած մի խրճիթ:  
Նրա «Փասաղը» ներկայացնում էր փայտի երկու  
կողիս սիւն, էլ ուրիշ ոչինչ, այնպէս որ խրճիթի  
մէջ եղած բոլոր իրերը դրսից պարզ երևում էին:  
Սյնտեղ կար ջրի կուժ՝ բերանը ծառի տերևներով  
խցած, մի դատարկ քեղան, որից սխտորի հոտ էր  
գալիս, էժանագին, հին կապերտի մի կտոր. առաս-  
տաղից կախուած էր հացով լի պայուսակը, պղնձէ  
կաթսան և մի հին եափնչի: Խրճիթին կից բարձ-  
րանում էր մի ահագին ընկուղենի, որ իրանից աւելի  
ահագին ստուեր էր արձակել խրճիթի և նրան  
չրջապատող մի որոշ տարածութեան վրայ: Սրևի  
ճառագայթները տեղ-տեղ թափանցելով ծառի ծիւ-  
ղերի միջով, փայլուն, զանազան գծերով ու կէտե-  
րով տատանւում էին մաքուր բուսականութեան  
վրայ: Խրճիթի սիւններից մէկի վրայ նոյնպէս շարժւում  
էին երկու իրար նման յուսաւոր կէտեր: Մառը իր

գնդաձև գաղաթով՝ սաստիկ կանաչ գոյներով նկարուած էր երկնքի պարզ կապոյտ ֆօնի վրայ:

« Ահա, բնութեան այս անշուք կտորը կը նկարեմ », վճռեցի ես և նստեցի խրճիթի դիմաց մի փտած ու թաց կոճղի վրայ: Սկսեցի նկարել: Անցաւ մի ժամ և Կաթիլս բաւական աշող էր դուրս գալիս և ես շտապում էի շուտով աւարտել, որովհետեւ լոյսերն ու ստուերները փոխւում էին, իսկ ինձ հարկաւոր էր մօմենտն ըմբռնել...

Յանկարծ աչքիս ընկաւ այգեպանը, որ բաճը ուսին դրած, կամացուկ քայլերով մօտենում էր խրճիթին: Նա ինձ չտեսաւ, մտաւ ներս, բաճը դրեց մի անկիւնում, շլինքը քորեց, յետոյ նստեց կապերտի կտորի վրայ և ձախ ոտքի թաց տրեխն ուղղելով՝ ինչ որ փնթփնթաց, կարծեմ հայհոյական մի բան ասաց: Այդ միջոցին նայեց իմ կողմը և Ֆնաց ապշած:

— Բարի լոյս, ասացի ես վրացերէն:

— Աստուծոյ բարին քեզ, պատասխանեց նա, տեղից կամաց վեր կենալով և գլխարկը շարժելով:

Նա միջահասակ, նիհար, մօտ 40 տարեկան վրացի էր, սուր քիթով և ահագին, խիստ կոշտ ձեռքերով:

Նա անշարժ կանգնեց դիմացս, այնպէս որ խանգարում էր ինձ նկարելու:



— Խնդրեմ քիչ այս կողմը դաս:

Կարծես նա ակամայ շարժուեց տեղիցը և քայլերն ուղղեց դէպի ինձ:

— Ի՞նչ ես գրում, խնդրե՛յն. հարցրեց նա:

— Քո խրճիթն եմ նկարում. ե՛կ տես:

Նա մօտեցաւ, կողքիս կանգնեց, յետոյ կամաց-կամաց կռանալով քիթը համարեա բոլորովին մօտեցրեց էտիւդին. սակայն ոչինչ չհասկացաւ:

— Այդպէս չի կարելի, մի քիչ հեռու կանգնի՛ր, այն ժամանակ բան կը հասկանաս:

Նա ինձ լսեց, կանգնեց երկու քայլ հեռու և սկսեց դիտել: Յետոյ լուռումունչ հեռացաւ այն տեղից, զնաց խրճիթի կողմը... և մի փոքր յետոյ, չգիտեմ ինչ տեղից, դուրս քաշեց մի ահագին դագանակ և իր տեղում կանգնելով՝ գոռաց. « Վէ՛ր կաց այստեղից, ապա թէ ոչ... »:

— Ի՞նչ պատահեց քեզ, այ՛ մարդ, — զարմանալով հարցրի ես. — այդպէ՞ս ես ընդունում հիւրին: Ի՞նչ ինձ դճւրս ես անում այստեղից, թոյլ չե՞ս տալիս, որ աւարտեմ գործս: Լա՛ւ, ես կը գնամ, բայց քեզ ցոյց կը տամ... »

Իմ խօսելու միջոցին նա կատաղած՝ շարունակ սպառնալից խօսքեր էր ուղղում ինձ, ստէպ - ստէպ ցոյց տալով դագանակի գլուխը:

Վրդովուած վեր կացայ տեղիցս, հաւաքեցի  
վրձիններս, փակեցի էտիւղարանս ու շտապաւ դուրս  
գալով այգուց՝ աւելացրի.

— Այս վարմունքը էժան չի նստիլ քեզ:

— Լաւ մարդը երբէք չի գայ այստեղ և քան-  
դուած խրճիթը վեր գրի... Եթէ դու լաւ մարդ  
ես, գնա, Շ - ի ու Ս - ի տունը վեր գրի... Ես  
գիտեմ, որ քեզ պէս մարդիկ միշտ խեղճերի և  
անօգնականների վրայ են յարձակուում... Գնա  
գանգատ տուր, «հալբաթ» ես էլ մի պատասխան  
կրդտնեմ տալու...

Լսելով այդ խօսքերը, ես չգիտէի՝ ծիծաղե՞մ,  
վրդովուե՞մ, թէ՞ ցաւեմ: Թէ ի՛նչն էր այդ տեսակ  
կոպիտ վարմունքի պատճառը, հաստատ չեմ կարող  
ասել, բայց ենթադրում եմ, որ նա ինձ ընդունեց  
որեւէ պաշտօնեայի տեղ, կարծելով թէ գնացել եմ  
նրա այգին ու խրճիթը վեր գրելու:

Իրանով վերջացաւ իմ նկարչական ճանապար-  
հորդութեան առաջին օրը:





Սղնախից երեսուն վերստ հեռաւորութեամբ, Ալազանի դաշտավայրի վրայ գտնուում է «Ղարազաչ» անուանուած մի փոքրիկ տեղ. դա մի սիրուն այգի է, աւելի սիրուն անտառին կից, շրջապատուած վարելահողերով: Այնտեղ սպասուած էր ինձ մանկութեանս ընկեր՝ երիտասարդ կալուածատէրը: Օրն արդէն տաքացել էր. ժամը 10-ն էր, երբ ծանապարհ ընկայ: Քաջ գիտենալով ձիուս դանդաղ ու անշնորհք լինելը, վճռեցի ոտով իննել ապառաժների վրայով մինչև ստորոտը, որովհետև սայլի ծանապարհն անհամեմատ երկար է: Մի ժամից յետոյ յօգնած ու շարդուած, շորերս երկու տեղից պատռուած՝ հասայ ստորոտը, ուր մի աղբիւրի մօտ հաւաքուել էին վրայ գիւղի կիսամերկ փոքր երեխաներ, որոնք աղմուկ բարձրացնելով քարեր էին արձակում ծառերի վրայ և ամեն անգամ մի վայրի խակ տանձ ընկնելիս՝ կուռումէին իրար հետ: Քիչ չուր խմեցի և նստեցի աղբիւրի մօտ հանդստանալու:

Մանուկներն ընդհատեցին աղմուկը և մի բոպէ իրար հետ քչփչալուց յետոյ, նրանցից մէկը, երևի ամենից քաջը, յետ-յետ գնալով հարցրեց ինձ.

«Շ է՛ն ուստի խա՛ր» (դու ո՞նք ես):

— Հայ էմ, պատասխանեցի ես: Յետոյ դրպա-  
նիցս ալ՛ բոմ հանեցի և սկսեցի գծագրել ո՛չ-հեռու  
գանուող գիւղական փայտաշէն տնակները: Բայր  
երեսաները մի ակնթարթում հաւաքուեցին շուրջս  
և միմեանց բոթրոթելով արգելում էին ինձ գծագրելու:  
Սյգ չարած ձիներից ազատուելու համար հարկաւոր  
էր խորամանկութեան դիմել. հանեցի տաս կոպե-  
կանոց արծաթէ մի դրամ և տալով նրանցից մէկին,  
պատուիրեցի որ իրանց մէջ հաւասար բաժանեն:  
Ինձ լաւ յայտնի էր, որ գիւղական երեսայի ձեռքին  
երբէք մի կոպէկ անգամ չի լինում, ուստի արծա-  
թէ դրամը նրանց բոլորովին պիտի շլացնէր: Եւ  
իրաւ, ստանալուն պէս, առանց ժամանակ կորցնելու,  
նրանք վազ տուին դէպի գիւղ:

Ուրուագիծն աւարտելուց յետոյ, ձի նստեցի և  
երեկոյեան ժամը 4-ին հասայ Ղարաղաչ: Հիւրընկալ  
ընկերս նախ և առաջ ինձ նախատեց ուշանալու  
համար, յետոյ յայտնեց, որ երեք ժամ է սե-  
ղանը պատրաստ է և ինքը քաղցած ինձ է սպա-  
սում:

Ճաշելուց յետոյ ընկերս պառկեց քնելու, իսկ  
ես գուշակելով, որ նոյն օրուայ վերջալոյսը գեղեցիկ  
պէտք է լինի, դուրս եկայ դաշտ: Թէպէտ յոգնած

էի և հանդատանալու կարիք էի զգում, սակայն  
անկարող եղայ սենեակում մնալ և արևի մայր-  
մտնելը չտեսնել: Իմ կարծիքով բնութեան զանազան  
երևոյթները, մանաւանդ վերջալոյսը, հետաքրքրելի  
են ամեն մի մարդու համար: Շատ անգամ պէյզա-  
ժիստները քաղաքից դուրս են գնում, սարերն են  
բարձրանում և սպասում արևի մայր-մտնելուն,  
քանի որ նրանց քաջ յայտնի է, թէ այսօրուայ մօ-  
մէնտն այլևս չի կրկնուելու: Եւ իրաւ, ես մինչև  
այսօր չեմ տեսած երկու անգամ ճիշտ իրար նման  
արշալոյս կամ վերջալոյս:

\*

Թամար թագուհու ամբողջ դիմացս է:

Յունիս ամիսն է: Արեգակը՝ ամբողջ օրը եր-  
կիրն այրելուց յետոյ մայր է մտնում: Կանաչախառն  
կապոյտ երկնքի վրայ տարածուած են բաց վար-  
դագոյն ամպի կտորները: Նրանք ամեն մի վայրկեան  
կերպարանափոխուելով, զանազան Փոնտաստիկական  
ձևեր ընդունելով լուռ ու անձայն արշաւում են  
հլուսիտից դէպի հարաւ: Նրանցից երբեմն պոկւում  
է մի փոքրիկ ամպիկ, առանձնանում, նօսրանում,  
նուազում է և միքանի շարժում գործելուց յետոյ  
անյայտանում երկնքի կապուտակութեան մէջ:

Նիկացացի արևը սողալով հորիզոնաձև ամպերի միջով՝ կրակ է տարածում իր շուրջը: Նրա տակ գտնուող մերկ ապառաժները կորցրել են իրանց վայրենի դէմքերը. նրանք ինձ դորաւոր չեն թւում: Նրանք զուղուել են ոսկեհիւս զգեստով, մեղմացել ու քնքշացել: Նրանցից մէկը, որ զերազանց է իր վսեմութեամբ ու վայրենութեամբ՝ անշատուած իր դրացիներից, հսկայական հասակով բազմած է անտառապատ բարձրաւանդակի վրայ: Նրա՝ մինչև ամպեր հասած զազաթը նման չէ սովորական ապառաժներին: Այդ տարօրինակ զազաթը նման է հինաւուրց աւերակների մնացորդներին: Արևը ուղղակի նրա վրայ է տարածել իր կիզիչ ճառագայթները, ուրեմն և արգելում է ինձ որոշելու խորհրդաւոր զազաթը: Ամբողջ ապառաժը իր յաղթանդամ մարմնով այս բոսպէին ներկայացնում է մի թափանցիկ սիլուէտ, էլ ուրիշ ոչինչ: Հասած արտերը, կանաչ բլուրները, որոնք միշտ բնութեան զարդ են համարւում, այժմ չեն զբաւում իմ ուշադրութիւնը. նրանց զեղեցկութիւնն ու վայլը նաեմացել են մայր-մտնող արեգակի առաջ: Ամենայն ինչ խաւար է թւում:

Ահա հրեղէն լուսատուն մօտեցաւ ժայռի մի անկիւնին, շիկացրեց նրան, այրեց, ոչնչացրեց և թազնուեց նրա ետեւում: Սապառաժը մօայլուեց

ու սև գոյներով նկարուէց աչք շլացնող ոսկեգօծ  
երկնքի վրայ՝ երկայն ստուեր արձակելով դէպի ինձ:

Ինձ հետաքրքրում է մուսլի հսկան, ուստի սպա-  
սում եմ արևի բոլորովին անյայտանալուն: Երկինքը  
ստտիճանաբար մղանում է, բոլոր բարձրաւանդակ-  
ները զրկում են ծիրանի զգեստից, ամպերը ծանրա-  
նում են և կորցնում իրանց թափանցկութիւնը:  
Նրանց մէջ տարածւում են զունատ, իրար նման  
երկայն ճառագայթներ, յետոյ նրանք սկսում են  
փոքր առ փոքր թուլանալ... Դարձեալ մի բոպէ և  
նրանք այլևս չկան:

Ստուերները նոյնպէս անյայտացան, սխուէտը  
պարզուէց, դաշտը կարծես հանդստութիւն ստա-  
ցաւ, փչեց թեթև զեփիւռը և արտերի մէջ քնքուշ  
շարժում տիրեց. նրանք արձակեցին մի ախորժալուր  
սրւարւոց:

Ահա արդէն երևացին Թամար թագուհու ամ-  
բոցի աւերակները: Բազմադարեան ապառաժը՝ իր  
անմատչելի դագաթի վրայ սրբութեամբ պահում է  
մինչև այսօր այդ աւերակների մնացորդները: Նրանք  
իրանց բարձրութիւնից ահարկու դէմքով դիտում  
են չորս կողմը և կարծես ոչ մի արարած չէ յան-  
դգնում վրդովել իրանց հանդստութիւնը: Այդ հսկան  
իր կրծքից ժայռի անթիւ կտորներ է պոկել ու

զլորել զաշտի չորս կողմը՝ ձա՛հ տարածելով խիտ բուսականութեան մէջ: Այնտեղ, մի անկիւնում, բեկորների ու ձայնառների խառնուրդի միջից բղխում է մի փոքրիկ աղբիւր: Չունենալով կանոնաւոր ճանապարհ, տարածել է իր աննշան ճիւղերը ամեն կողմ: Ապառաժը իր մէջ հարիւրաւոր ձեղքեր է բացել, որոնցից դուրս են ցայտել հազարաւոր ծառեր ու թփեր, զրկախառնուած իրար հետ, ծածրուած և զլխիվայր կախուած: Բացց զաղաթը ճնշուած չէ, աղատ է ամեն բանից. նա ինձ թւում է մի զերբնական ոյժ, որի առաջ փայլալն ու կայծակն անդամ անդօր են:

Նա արդէն սկսում է ընկղմուել խաւարի մէջ, ծածկուել է անթափանցելի քողով: Բուսականութիւնը սեանումէ, երկինքն ընդունում է սառն, ձուգ-կապոյտ գոյն, սասողերը մէկը միւսի յետեւից յայանում են ու թոյլ կերպով փայլում: Հողմը սաստկանում է, սայլի ճանապարհից թեթև փոշի է բարձրանում, զաշտի միջից ծաղիկների հոտ է բուրում և ապառաժը՝ Թամար թագուհու ամրոցի հետ փոխւում է մի սև, տափակ ու ահռելի զանգուածի:

— Վաղը՝ ղեռ արև չձագած, կը գծազրեմ ալբոսմիս մէջ այսօրուայ բոլոր տեսածներս, մտածեցի ևս ու վերադարձայ տուն, ուր ընկերս սպասում էր ինձ:



Այրօմիս մէջ մտցնելով բնութեան զանազան տեսարաններ՝ հասայ Յարսկիէ - Կօլօղցի, կամ ինչպէս ժողովուրդն է անուանում՝ Թուքուրմիշա ռուսական զիւղը, որ գտնուում է Թամար Թագուհու ամամրոցից հինգ վերստ հեռու դէպի հիւսիս։ Հասնելուս պէս հին բարեկամներիցս մէկը խորհուրդ տուաւ, նոյնիսկ խնդրեց, որ անպատճառ նկարեմ այդտեղի ժողովրդի մէջ յայտնի Քիտոյի կերպարանքը։ Թէպէտ մարդկանց դէմքեր նկարելն առհասարակ չեմ սիրում, բայց և այնպէս մի ամբողջ խումբ երիտասարդներին զուարճութիւնից չզրկելու համար, վճռեցի նկարել հաշակուած Քիտոյի դէմքը։

Միքանի ժամից յետոյ Քիտօն կանգնած էր առջևս։ Նա ձախ աչքը ծածկելով և բերանը ծածկուելով՝ շարունակ քորում էր զլուխը և յիմար ժպտար երեսին նայում էր ինձ։ Նա մօտ քսանևեօթ տարեկան երիտասարդ վրացի էր, նիհար, հիւանդոտ կազմուածքով։ Թէպէտ նրա արտաքին տեսքը ակամայից ծիծաղ էր շարժում, սակայն միևնոյն ժամանակ առանց խղճալու չէի կարողանում նայել Թշուառ արարածին. նա խելագար էր։

— Կուզե՞ս պատկերդ նկարեմ, հարցրի վրացերէն։

Նա գլուխը շարժելով և ծիծաղելով համաձայն-  
նութեան նշան տուաւ:

— Եթէ քառօրդ ժամ հանդիստ նստես, ես  
քեզ քսան կոպէկ կը տամ, ասացի:

Նա նայում էր դէպի ցած:

— Քսան կոպէկ կը տամ, կրկնեցի նորից:

— « Էրթի տաքանից արաղի » (մի բա-  
ժակ էլ օղի), վերջապէս պատասխանեց նա:

Այս պատասխանին յաջորդեց երիտասարդնե-  
րի կողմից բարձրաձայն ծիծաղ: Մի բաժակ օղին  
խփոյն և եթ խմացրի և խոսաացայ մի բաժակ էլ  
նստելուց յետոյ տալ:

Մալապատիկ նստեց և ամբողջ քառօրդ ժամ  
արձանի նման անշարժ մնաց: Երիտասարդները  
ձօտս հաւաքուած, անհամբեր սպասում էին վերջա-  
ցնելու: Նրանք լուռ էին, միայն երբեմն - երբեմն  
վրթկացնում էին, տեսնելով նմանութեան նշանները:

Նկարն աւարտուեց, Քիտոն իր քսան կոպէկը  
և մի բաժակ օղին ստացաւ, ապա երիտասարդներին  
յիշոցներ ուղղելով, զնաց անհետացաւ...

Միւս օրը առաւօտ վաղ անկողնիս մէջ լսեցի  
փողոցից դժգոհութեան ձայներ, սպառնալիք,  
յիշոցներ և վերջապէս մեր բնակարանի թխթխկո-  
ցը: Նիւրբնկալ բարեկամս դուրս զնաց տեղեկանա-



լու, թէ ո՞վ է, կամ ի՞նչ է ուզում: Նա վերադարձաւ ծիծաղից թուլացած. միքանի անգամ փորձեց պատմել, բայց իւրաքանչիւր անգամ ձայնը խեղդուում էր կոկորդի մէջ:

— Ի՞նչ է պատահել, դուռը ծեծողն ո՞վ է, դարձացած հարցրի ես:

Յիշոցները շարունակուում էին. ես ճանաչեցի Քիտոյի ձայնը:

Գաղտնիքը պարզուեց: Երիտասարդները Քիտոյին հաւատացրել էին, որ իբր թէ նրա պատկերը ես նկարել եմ իշխանութեան ներկայացնելու նպատակով: Եթէ իշխանութիւնը հաւանի, անմիջապէս Քիտոյին զինուոր կը տանեն, եթէ չհաւանի, հրացան կ'արձակեն պատկերի վրայ և Քիտոն այստեղ կը մեռնի:

Ուրեմն դժուար չէ հասկանալ, որ յիշոցները իմ հասցէին էին ուղղած: Հաղիւ հաղ ինձ աչողուեց համոզել Քիտոյին, որ երիտասարդները հանաք են արել:

\*

Նոյն երեկոյեան նստած ծանօթներիս հետ թէյ էինք խմում, երբ նաւթագործարանի մշակներից բաղկացած մի ահադին խուճբ եկաւ և կանգ-

նեց մեր սենեակի բաց դռան առաջ Երևում էր, որ նոր էին դուրս եկել զործարանից, որովհետև ամբողջովին սևացած էին: Նրանց մէջ կային հայ, վրացի և մասամբ ռուս մշակներ:

— Ի՞նչ էք ուզում, գիմեցի նրանց:

Իմ հարցին յաջորդեց մի անտանելի խառնակութիւն: Ամենքն սկսեցին միասին խօսել, մասնացոյց անելով մշակներից մէկին: Երբ խնդրեցի, որ նրանցից միայն մէկը խօսի, մի անողջակազմ զահէլ առաջ եկաւ, բեղերն ուղղեց ու սկսեց.

— Այս տղան մի շարաթ առաջ քսան մանէթ կորցրեց, զողացան, բայց չգիտենք ո՞վ է զողացել: Հիմա մենք խնդրում ենք քեզ, որ կարարադինը բաց անես ու իմանաս թէ մեր միջից ո՞վ է զողացողը:

Ես մնացի շուարած. ծանօթներս նոյնպէս լարեցին իրանց ուշադրութիւնը:

— Ես կարարադին բաց անող չեմ, պատասխանեցի:

— Հասկա ո՞վ է:

— Զգիտեմ:

— Գիտենք որ դու ես, փող ենք տալիս, ձրի խօ չենք ուղղում: Ախար երկու օր է մենք տեսնում ենք, որ շրջում ես ամբողջ գիւղը և որտեղ էլ նրս-

տում ես, ժողովուրդը հաւաքւում է, դու էլ նրանց  
համար կարարագին ես բաց անում: Եթէ սխալուած  
ենք, ների՛ր:

Բարեկամներիցս մէկը հասկանալով բանի էու-  
թիւնը, իսկոյն վազեց - բերաւ էտիւզարանս, բաց  
արաւ և յոյց տալով նրանց զոյնդգոյն ներկերը,  
հարցրեց.

— Ո՞ր զոյնի վրայ էք ուզում, որ նա բաց անէ:

— Իր կամքն է, մենք ի՞նչ զիտենք, պատաս-  
խանեցին ամենքը միասին:

Նրանց միամտութեան վրայ բաւական ծիծա-  
ղելուց յետոյ բացատրեցի, որ ես կարարագին բաց  
անող չեմ, այլ նկարիչ... Իրանց դէմքերի վրայ դժգո-  
հութիւն արտայայտելով գնացին—հեռացան:



#### IV.

Սեանայ լիծը, որի մասին շատ էի լսել, բայց չէի տեսել, վճռեցի անպատճառ տեսնել և որքան կարելի էր շուտ Երզնցի Վրաստանի և Դաղստանի զանազան տեղերը, բաւականաչափ նիւթեր հաւաքեցի և վերջապէս ծանապարհ ընկայ դէպի Սեան:

Աղստաֆայից սկսած բնութիւնը շատ գեղեցիկ է: Դիլիջանի ձորը հիացրեց ինձ: Ռազմավիրական ծանապարհը, որ սովորաբար նմանեցնում են յիշեալ ձորին, նոյնպէս հիանալի է, բայց ես մի առանձին նմանութիւն չեմ գտնում այդ երկու գեղադրական տեսարանների միջև: Երկուսն էլ վսեմ են, երկուսն էլ դեռ ևս կուսական դրութեան մէջ, ինժեներների յանդուգն ձեռքը դեռ չէ աւերել նրանց գեղեցկութիւնը, ինչպէս աւերել է Շվէյցարիայի աննման բնութիւնը: Կովկասեան սարերի ծանապարհը համեմատում եմ առողջակազմ և յաղթանդամ լեռնրջուհեա, որի հայեացքը և՛ դրաւիչ է, և՛ սարսափեցնող: Իսկ Դիլիջանի ձորը նման է գիւղական խրճիթում ծնուած ու սնուած և կուսական անտառների մէջ մեծացած մատղահաս գեղեցկուհու, որի կրակոտ

աչերը արտայայտում են անվեհերութիւն, բնական  
պարզութիւն և անմեղութիւն: Սակայն այդ երկու  
հրաշալիքների մասին կրթօսեմ մի ուրիշ անգամ,  
պատմական կղզին տեսնելուց յետոյ:

\*

Սևանայ լիճը փռուած է առջևս: Սշնան երե-  
կոյ է. մութը նոր է ընկել: Սրեմտեան կողմը, հո-  
րիզոնի մօտ՝ երկնքի վրայ դեռ ևս երևում են վեր-  
ջալոյսի թոյլ, կարմրագոյն հետքերը: Շուրջս մօայլ  
է և անշարժ: Լիճը, ծովի կերպարանքով՝ ննչում է:  
Մուգ-կապոյտ երկինքը, որի իսկական դոյնը կարե-  
լի չէ արտայայտել բառերով, ճշտութեամբ անդրա-  
դարձել է ջրի մէջ: Ծովակը այս բոպէին ներկայա-  
ցնում է մի ահագին անձեռագործ հայելի, որի մէջ՝  
երկինքն իր միքանի հասիկ խոշոր աստղերով և  
մերկ, բուսականութիւնից զուրկ բլուրներն ու ա-  
պառաժները տեսնում են իրանց դէմքերը: Կղզին,  
հայ հոգևորականութեան այս հինաւուրց աքսորա-  
տեղին՝ իր խորհրդաւոր կերպարանքով դուրս է  
ցցուել ծովի յատակի միջից և պառկել ջրի մակերե-  
ւոյթի վրայ՝ իր ուսերի վրայ պահելով հսկայական  
հին ճարտարապետութեան յիշատակները: Երկրից ան-

չատուած, բայց զրերով շրջապատուած մայլ հսկան  
մեծ տպաւորութիւն է դործում մարդու վրայ: Ցա-  
մաքարերդ հայ գիւղը՝ իր գետնափոր անակներով և  
եղիպտական բրդաձև աթարների կոյտերով բազմած  
է ծովակի տիին և դիտում է կղզին: Ս.մեն տեղ  
տիրում է անդորրութիւն, միայն երբեմն լսում է  
գիւղի կողմից պառաւ շան անասորժ հաչոցը և  
երբեմն էլ հասնում է ականջիս ամենախուլ կերպով  
զանգուլակների աններդաշնակ բութ ձայնը. երևի ուղ-  
տի կարաւան է գալիս:

Կանգնած եմ ծովափեայ բարձրաւանդակի վրայ  
և անհամբերութեամբ սպասում եմ լուսնի ծագե-  
լուն: Այո՛, լուսնի ծագելուն, բնութեան հրաշալիք-  
ների մէջ իմ ամենասիրելի վայրկեանին, որ շատ  
անգամ է փարատել սրտիս թախիծը: Լիճը, երեք  
կողմից շրջապատուած քարափներով, պատուել է  
չորրորդ կողմը և փռուել սղքով անհասանելի տա-  
րածութեան վրայ, ուր աղօտ կերպով նշմարում  
են լեռների փէշերը, որոնց շարունակութիւնը կոր-  
չում է ջրի, երկնքի և երեկոյեան մշուշի մէջ...

Վերջալոյսի հետքը այլևս չկայ: Երկինքն ու  
երկիրն աստիճանաբար խաւարում են, իսկ աստղե-  
րը բազմանում են ու պայծառանում: Նրանցից շա-  
տերը ժպտում են, շարժւում և ֆօսֆօրի փայլ են



արձակուժե՛ս իրանց միտքից, իսկ միւսները անշարժ համբերութեամբ նայում են դէպի ցած, մեղքերով լի երկրի վրայ: Զանգուլակների միահնչիւն, մելամաղձոս ձայնը փոքր առ փոքր մօտենում է. լսում է նոյնպէս ուղտապանի երգի ազդու ձայնը, արևելեան զգայուն եղանակը—բայեաթին: Գիւղի անակների մէջ, մէկը միւսի ետևից յայտնւում են զիւղական անպաճոյճ ծրագները և սլարղ որոշելով փոքրիկ պատուհանների ձևերը հազիւ ճառագայթում են դուրս: Ահա կզղու վրայ երևաց մի ծրագ. նա տատանւում է, հանգչում, նորից վառւում, պայծառանում, նուազում է և վերջապէս բոլորովին անցայտանում:

Տափարակ դադաթով բլուրի ետևը երկինքը փոքր ինչ շառագունւում է:

«Վերջապէս մօտեցել է լուսնի ծագումը», ուրախալի միտքն է անցնում գլխովս: Ամպի միքանի կտորները ներկւում են կարմրախառն մուգ-դեղին գոյներով, որոնք անփոփոխ արտացոլում են անշարժ ջրի մէջ: Երկիրն էլ, որի երեսը շարունակ ծածկուած է սև քօղով, ինձ նման սպասում է լուսնին, իր գիշերային պահապանին:

Շարունակ նայում եմ երկնքի շառագունուած մասին, որ փոքր առ փոքր ընդարձակւում է երկնակամարի վրայ և ամօթխած լուսնի մերձենալն է դու-

շակում աշխարհին: Բլուրներից մինը այս միջոցին  
 հրաբուլիս է թվում ինձ, զագաթի վրայ կրակ է  
 նշմարում, նա մեծանում է, աճում, բարձրանում  
 և իր հրաշեկ, բայց համեստ դէմքն ամբողջապէս  
 դարձնում է դէպի երկիր և զիշերային ողջոյն ու-  
 զարկում: Նայում է իր շուրջը և ամեն տեղ ազօտ  
 լոյս է սփռում, նայում է դէպի վայր և իր պատ-  
 կերն է տեսնում: Ծարունակում է բարձրանալ, սա-  
 կայն նկատելով որ աշխարհիս շնչաւոր թէ անշունչ  
 բոլոր էակները իր կողմն են ուղղել իրանց հայեացքը,  
 մօտենում է երկնային քօղին և դեռահաս պարկեշտ  
 կոյսի նման ծածկւում նրա տակ մի բոպէ, բայց՝  
 զրդուած հետաքրքրութիւնից, երբեմն-երբեմն բար-  
 ձրացնում է իր բոլորակ դէմքից քօղի մի անկիւնը,  
 նայում է վայր, դարձեալ տեսնում անձեռագործ  
 հայելիի մէջ իր երեսը և արադութեամբ նորից ձրա-  
 նում քօղի տակ: Այս միջոցին միտս է բնկնում  
 վշտահար բանաստեղծի խօսքերը.

Թագնուիր, ո՛վ լուսին, մթան սիրահար,  
 Դէմքդ սև քօղով թո՛ղ ծածկեն ամպեր.  
 Մի՛ լուսաւորիր դու այսքան պայծառ  
 Այս դաշտն ու հովիտ, այս խորունկ ձորեր.  
 Օ՛ն, աչքէս հեռի...



Բնութեան այս վայրկեանը հրասուրբիչ է և մեյամաղձական...

Անցնում է ժամանակ. եղանակը փոխվում է. բարձրանում է հողմը և բնութեան այս սրբազան անդորրութիւնը խանգարւում: «Մթան սիրահարի» դէմքից պոկւում է քողը և մի կողմը շարտւում: Նա կարծես կերպարանափոխուել է, քնքշացել, մաքրուել և արծաթապատել իրան: Հողմը փչում է ծովակի վրայ և յանկարծակի հարուած տալիս: Նա քաղցր բնից արթնանալով, դեռ կամաց շարժւում է տեղից, յետոյ խուլ հառաչում, ընկնում այս ու այն կողմը և կատաղաբար փրփուրներ արձակում կրծքի միջից: Նրւշըրուոցով մօտենում է ժայռերին, դարձեալ յետ քաշւում, նորից մօտենում, բարձրանում և դանդուրներով զարդարուած ծակատով մարտնչում նրանց հետ: Ծակատամարտն անընդհատ շարունակւում է. ալիքներն անթիւ անգամ շարդուփշուր եղած յետ են վազում: Նրանց կատաղութիւնը սաստկանում է: Հազարաւոր ալիքներ՝ իրանց գլուխը բարձրացրած՝ խումբ խմբի ետևից մռնչալով նորից յարձակւում են՝ ցանկանալով պատառել իրանց ձնշող ժայռի կուրծքը, ուստի ձիգ են թափում, բայց զգալով հսկայի անվեհերութիւնը, յետ են քաշւում ամօթով: Իսկ ժայռն իր թրչած փէշերով նայում է բարձրութիւ-

նից ներողամտարար և ժպտում նրանց անմտութեան վրայ: Լուսնի դէմքը, որ մի ժամ առաջ պայծառ երևում էր անշարժ ջրի մէջ, այժմ բիւրաւոր մանր կտորների է փոխուել և իր փշրանքները տարածել ծովակի մի որոշ մակերևոյթի վրայ: Ալիքները չեն կարողանում հանդիսա դանել, նրանք բարձրանում են, իջնում, ճնշում իրար և դարձեալ յիշելով անհրաժեշտ պատերազմը, ձեռք ձեռքի տուած մօտենում են ժայռին, հաւաքում իրանց ամբողջ ոյժը, փքվում, ուռչում, բայց իզուր, անյաղթ հսկայի ոտների տակ միշտ յաղթուած են հանդիսանում: Լուսինը տեսնելով ծովի կատաղութիւնը, աստիճանաբար բարձրանում է երկնականարի վրայ աղմուկ չլսելու համար: Նրան շրջապատել են մաքուր ամպերը, ինչպէս ընկերուհիները հարսնացուին, և իրանց մէջ բոլորաձև ծիածան կաղմկով փայփայում են նրան: Երկինքը թափանցիկ է և սև, ուստի լուսնեակն իր արծաթեայ կայծերով աւելի պայծառ է նկատուած խաւար ֆօնի վրայ, ինչպէս դեղեցկուհին սղաղղեսափ միջից:

Գեղամայ կղզին մօայլ ու դաժան կերպարանքով ննչում է ջրի վրայ: Ո՛չ լուսնի զրաւիչ դէմքը, ո՛չ ասաղերի ժպիտը և ո՛չ էլ այնկոծուած ծովի աղաղակը չեն աղղում նրա վրայ: Վանքերի զմբէթ-

ները՝ իրանց խաչակիր զազաթներով սև գոյներով նկարուածեն ծովակի լուսաւորուած մասի վրայ: Լճի զայրացած ալիքները, շրջապատած կղզու չորս կողմը, երբեմն աղերսանքով դիմում են նրա օգնութեան, երբեմն սպառնալիքներ են ուղղում. բայց՝ «քար է նրա սիրտը և խիղճը մեռած»: Նա անգթութեամբ յետ է մղում նրանց: Յուսահատուած յետ են դառնում և հանդիպելով ընկերներին, գրկախառնում են իրար և ընդհանուր ոյժերով աղաղակ բարձրացնում, զլուխ զլիսի են զարկում և փրփուրը մինչև երկինք բարձրացնում. բայց, աւանդ, երկինքն էլ է խուլ և համար...

Ահա՛ երևաց ալիքների վրայ առադաստաւոր մի նաւակ. նա կարծես միենոյն տեղը տատանուելոյ, աննշան տաշեղի նման երբեմն բարձրանում է, երբեմն իջնում ցած. — արդեօք ո՞րտեղից և ո՞ւր է գնում:

Քամին շարունակվում է և ծովակի կատաղութիւնն աւելի սաստկացնում:

Ինչ գուր չէ՛, զայլս բնութեան խռովութիւնը. նա չի հիացնում, այլ միայն վրդովում է մարդուս հոգին...



1883 թ. ապրիլ ամսի 22-ն էր, երբ Վլադիկավկազից առաւօտեան դուրս եկայ Երկձի լծած սայլակով դէպի Թիֆլիզ:

Միայնակ լինելուս պատճառը մի վէճ էր, որ տեղի ունեցաւ յիշեալ քաղաքում իմ և մի բժիշկ ուսանողի միջև, որի հետ Պետերբուրգից մինչև այդ տեղ միասին էինք եկել և պէտք է խոստովանուէմ, որ շատ համակրելի ծանապարհորդակից էր: Վէճի առիթն եղաւ մի անմեղ բան: Խօսակցութիւնը սկսուեց նրանով, որ ես՝ յափշտակուած, անդադար կրկնում էի՝ «վերջապէս միակերպ տափարակ բնութիւնից ազատուցինք և շուտով տեսնելու ենք հրաշալի Դարիալի ձորը»: Իսկ նա, որ բոլոր ժամանակ «այո» և «բ՛հր»-ով էր համաձայնում հետս, վերջին անգամ, երեւի (այժմ նոյնիսկ համոզուած եմ) համբերութիւնից դուրս դալով և իրան կորցնելով, մանաւանդ որ սաստիկ յոգնած ու ջարդուած էր, պատասխանեց կոպտաբար և այդ բոլորի պսակն այն եղաւ, որ նա նկարիչների և նախշքարների միջև մի առանձին զանազանութիւն չգտաւ: Իսկ ես վերին աստիճանի վիրաւորուած՝ առանց երկար մտա-

Տելու սպասասխանեցի՝ «Ուրեմն եթէ այդ տեսա-  
կէտից նայելու լինենք, կը դտնենք, որ բժիշկների և  
դասարանների միջև էլ մի առանձին զանազանութիւն չկայ:

Մեր վէճը տեղի ունեցաւ Վլադիկավկազի փոս-  
տային ընդհանուր հիւրասենեակում, ուր մի անկիւ-  
նում սեղանի մօտ նստած ընթրում էր թիֆլիզեցի  
մեզ անձանօթ մի երիտասարդ զինեվաճառ, որ նոյն-  
պէս միւս օրը մեկնելու էր դէպի Հայրենիք: Նա,  
ըստ երևոյթին, մեր խօսակցութեամբ ու վիճա-  
րանութեամբ ո՛չ հետաքրքրուած էր և ոչ էլ հասկա-  
նում բանի էութիւնը. բայց որքան մեծ եղաւ  
իմ զարմանքը, երբ մեր յոգնելուց ու լռելուց յետոյ,  
անսպասելի կերպով, «լօթի» թիֆլիզեցիներին յա-  
տուկ զուարճախօսութեամբ արտասանեց՝ «դօխ-  
տուրն էլ է լաւ, էն մէկէն էլ է լաւ, իմ արիւ, ձիր  
արիւ. ի՞նչ խիստ էք չարանում, լաւ մարդիկ»:

Սյդ փոքրիկ կատակը այնպիսի կօմիկական  
ձայնով ասուեց ու այնպիսի ազդեցութիւն ունեցաւ  
վրաս, որ չնայած իմ վրդոված սրտին՝ ծիծաղս հա-  
ղիւ խեղդեցի կոկորդիս մէջ: Իսկ բժիշկը մի ակըն-  
թարթում վեր թռաւ տեղից ու վազեց միւս սե-  
նեակը, կարծեմ նոյնպէս ծիծաղը թագցնելու հա-  
մար:

\*

Վլադիկավկազից դուրս դալով, միքանի ժամից յետոյ արդէն գտնուած են Դարիայի ձորի մէջ Օղը մուսլ է, խոնաւ և ցուրտ: Աջ կողմ ապառաժներ, ձախ կողմ ապառաժներ, վերջապէս շուրջս ապառաժներ, որոնցից մէկի ստորոտով գնուած են և շարունակ նայուած վեր, բարձր, որտեղից կիսաբանդ կամարների ձևով գլխիվայր կախուել են ահագին ժայռեր: Նրանք նայուած են ցած և սարսափ ներշնչուած ինձ: Եթէ մի կտոր, թէկուզ մի չնչին մասը պոկուի իր տեղից՝ ինձ սայլակիս հետ միասին փոշիի հետ կը հաւասարեցնէ: Բնութիւնը մտադիր չէ եղել այստեղ ճանապարհ բանալու, բայց յանդուգն մարդը ինչե՞ր չի արել:

Ընթանուած են դէպի առաջ և բարձր: Մեր ուղին սկսվում է ժայռերի ստորի փէշերից և ոլորմոլոր պտոյտներով բարձրանուած դրանց կրճքի վրայով ու դիմուած ձիւնապատ գաղաթների կողմը, որոնք այս միջոցին ծածկուել են սպիտակ և մոխրագոյն անպերով, այն երկնային սաւանով, որի միջից երբեմն - երբեմն դուրս են ցայտում հատիկ - հատիկ մշտականաչ եղևնիներն ու մայրերը և դարձեալ անհետանում: Ապառաժներն անընդհատ միմեանց են յաչորդում: Նրանք բազմաթիւ և բազմաձև ծալքերով ձգվում են անդնդային մուսլ ձորի միջով և միա-



խառնվում անթափանց թանձր կապուտակի հետ, ուր վարագուրուած է գարնան քնքուշ երկնակամարը: Ամեն տեղ տիրում է խլացուցիչ աղմուկ, որ յարձար կերպով ներդաշնակում է վայրենի բնութեանը: Այս աղմուկը, գոռում-գոչումը կատաղի թերէքին է պատկանում: Դա զլխիվայր վաղելով քարքարոտ յատակի վրայից և ամեն ինչ քարուքանդ անելով, անխնայ շարժում է այս ու այն կողմ ժայռերի միջից պոկած ահագին բեկորներ: Դա նման չէ սովրական արագահոս գետերին, դա կատաղի է և իր կատաղութիւնը հասցրել է դազաթնակէտին: Կորցրել է իր գոյնը, կորցրել է բոլորովին իրան: Հազարաւոր պտոյաներ անելով քարի է զարկվում, ամեն ինչ զրջւում, արձատախիլ անում, շարդում ու փշրում: Երչապատում է կղզիացած ամբապինդ ժայռերին և անէծք ու սպառնալիք ուղղում՝ «նչին արարած, եթէ ոչ այսօր, գոնէ վաղը անշուշտ կը պոկեմ տեղիցդ, կը դարկեմ ամիդ և փշրելով կ'ոչնչացնեմ քո գոյութիւնը»: Ետումէ ամբողջապէս, բլուրներ ու անդունդներ կազմում, նորից շուռ է դալիս և ջրնջում ու իր հետ տանում: Այստեղ ծափ է տալիս, այնտեղ ապտակում-ծեծում, երբորդ տեղ խփում զուխը գեանին և մի ակնթարթում թռչկոտում բարձր, շատ բարձր՝ թուքեր արձակելով ամեն կողմ:

Նա անգութ է՝ զոռոզ և հպարտ: Չի ուզում ջրի նմանուել, ամբողջապէս փրփուրի է փոխուել: Մանր ու խոշոր սիրուն առուակներ ամեն մի քայլափոխում ծնունդ են առնում ժայռերի կրճքի միջից, կարկաչելով ուրախ-ուրախ վազում են ներքև, ձորի մէջ կատարուող աղմկալից տեսարանը տեսնելու, բայց անողորմ հրէշը կլանում, խեղդամահ է անում այդ ծաղկահասակ անմեղ արարածներին:

\*

Ընթանում եմ դարձեալ դէպի առաջ և բարձր: Ճանախարհը՝ իր անթիւ պտոյտներով դիմում է զազաթների կողմը. նա ոլորուելով՝ ապառաժների վրայ աստիճանաբար նուազում է, իսկ բարձր ամպերի մօտ մոխրագոյն թելի է նմանում և վերջապէս անյայտանում: Ճանապարհի վրայ, մի քանի հեռու տեղեր շարժական կէտեր են նշմարւում. նրանք անշուշտ մարդիկ՝ լեռնըցիք են իրանց բեռնակիր սայլակներով, կամ հարուստ քաղաքացիք՝ շքեղ կառքերի մէջ բազմած: «Սհա՛ ո՛րտեղ է երևում մարդու ոչնչութիւնը բնութեան դէմ», ահամայ անցնում է մտքովս: Այս տեսարանը յիշեցնում է ինձ շատ անգամ տեսածս մրջիլնների արշաւանքը դարև-



ւոր կաղնիների և ընկուղենիների վրայ: Մտաբերում եմ այս միջոցին ձարդկային հանձարի զանազան վսեմ արտադրութիւնները՝ կոթողներ, տաճարներ, ամրոցներ, մտքով տեղափոխում եմ նրանց այստեղ, համեմատում բնութեան այս ահարկու ստեղծագործութիւնների հետ և հիասթափւում: Ահա՛ նրչմարում են հեռաւորութեան մէջ սպիտակ բծեր, որոնք կամաց-կամաց աճում են: Փոքր առ փոքր մօտենում ենք նրանց, դա «Կազբէկ» կայարանն է:

\*

Անցնում է քսան բոպէ, ևս դարձեալ շարունակում եմ ճանապարհս: Ժամը երկուսն է: Չարազուժ սե-սե ամպերն իրանց դաժան դէմքերով անշտասլ սողում են երկնքի վրայով և շփուելով բուսազուրկ լեռներին՝ տալիս-անցնում են: Կապուտակ երկինքն ամբողջապէս քողարկուած է. միայն երբեմն - երբեմն դուրս են ցայտում արեգակի նուազ ճառագայթները, բոպէապէս շամանդաղ են տարածում ձորի այս ու այն տեղի վրայ և արագութեամբ իսկոյն չքանում:

— Փոթորի՛կ է լինելու, հարցնում եմ ձիավարին:

— Այո՛, պատասխանում է անհանգստութեամբ ու թափ տալիս զլուխը:

Ամպերը հետզհետէ թանձրանում, իջնում են

աստիճանաբար դէպի երկիր, ձորը լցւում է աղչա-  
մուղչով, խաւարում է ամեն ինչ և օդի մէջ տիրում  
է մի առանձին հոտ, որ յիշեցնում է ծովային խոնա-  
ւութիւն: Բարձրից նայում եմ ցածր, դէպի անդունդ,  
ուր Թերէքը շարունակ բնթանում է իր գոռում-գո-  
չումով, բայց այս գոռում-գոչումը այս անգամ սիրտ  
ճնշող ողբի է նմանում, որով կարծես բնութեան  
խռովութիւնն ու արհաւիրքն է դուշակում: Լեռնը-  
ցիները սայլերը կանգնացրել են ճանապարհի ապա-  
հով անկիւնում, նեցուկներ են տուել անիւներին և  
պատրաստում են սայլերի տակ մտնելու: Ստէպ—  
ստէպ սլանում են մօտովս վախեցած թռչունները  
և շտապում իրանց բները:

Իմ ձիավարը մերթ խրախուսում է իր ձիերին,  
մերթ սպառնում, ստիպում է ամեն կերպ իրանց  
քայլերն արագացնել: Խելացի անասունները կարծես  
նոյնպէս զգում են անխուսափելի վտանգը: Նրանք  
ամենայն հաւատարմութեամբ աշխատում են, ճիգ են  
թափում շուտով տեղ հասնելու, բայց այս անողորմ  
զառիվայրը ուժասպառ է անում նրանց:

Յանկարծ հրեղէն փայլը մի ակնթարթում  
փռում է բնութեան մէջ ու հանգչում, նրան յաջոր-  
դում է մի խուլ ու հեռաւոր որոտուժն և դարձեալ  
լռում է ամեն ինչ: Միմիայն ներքև, ձորի մէջ Թե-

բէքը շարունակու՛մ է իր ողբը: Դա այլևս կատաղի գաղան է, այժմ արտասոււալից աղաղակներ է արձակու՛մ: Փայլակը նորից դուրս է պրծնու՛մ ամպերի միջից, միքանի կրակոտ ցնցու՛մներ է գործու՛մ ու դարձեալ տեղի տալիս խաւարին. դրան հետեւու՛մ է որոտու՛մն և անձրևի խոշոր կաթիլները ուժղին դարկու՛մ են դետնին, որի վրայ դրոշմու՛մ են սև կէտեր:

Ահռելի ժայռեր, անդնդային ձոր, անողորմ գետ, դժոխային ամպեր, տարօրինակ խաւար — այս բոլորը կարծես դաշն են կապել իրար հետ խաղ խաղալու, բոլորովին ճկատելով իրանց գրկու՛մ սրբանեղված կենդանի արարածների գոյութիւնը: Նորից հրեղէն շանթեր, նորից սարսափելի ճայթու՛մն: Դղբը դու՛մ է երկիրն ու արձագանքը միքանի անգամ կրկնու՛մ է խառնաշփոթ ձորերի մէջ: Անձրևն սկրսու՛մ է առատութեամբ թափուել լեռնային յատուկ շխշխոցով և միախառնու՛մ է արդէն ձորի խորքերու՛մ անհետացած Թերէքի ձայնին: Այս վայրենի համերգը շարունակու՛մ է: Երբեմն ընդհատու՛մ է ամպերի որոտումից, երբեմն խանդարու՛մ ձիավարի անբաւական ձայնից, բայց դարձեալ շարունակու՛մ:

— Զէ՞ որ առաջարկեցին ձեզ մի-երկու ժամ սպասել կայարանու՛մ, նկատեց ինձ ձիավարը. երևի ձեզ հաճելի է այսպիսի բանը:

— Դու հանդիստ կայ, ինչ լինելու է թող  
լինի, ես չեմ վախենում:

— Երևում է, որ դուք դեռ ևս չէք տեսել  
այստեղի « զաւալները »... « ՆՈՒՄ, Վասկա »,   
եղաւ պատասխան, զղուշութեամբ մտրակելով ձիուն:

Ես նստած եմ սայլակի մէջ անշարժ, կռացած  
և աչքերս կիսարաց, որովհետեւ անձրևի ուժեղ շի-  
թերը թեք ուղղութեամբ ուղղակի երեսիս են զար-  
կում: Աչք եմ դարձնում աչ կողմ և տեսնում  
որ ժայռի միջից ամեն մի քայլափոխում քարեր են  
պոկում ու զլորում ցածր, բայց բարեբաղդարար  
ոչ շատ խոշոր: Փայլակ, կայծակ, որոտումն անդա-  
դար յաշորդում են միմեանց և կարծես սպառնում են  
կործանել աշխարհը և երկինք ու երկիր իրար խառնել:

\*

Ճանապարհը շարունակ բարձրանում է: Անձրևի  
կաթիլներն զղալի կերպով մանրանում են ու բազ-  
մանում: Ես փոքր առ փոքր բնկղմւում եմ թուխ զո-  
լորշու մէջ, որ աստիճանաբար թանձրանում է:  
Վարձեալ քառորդ ժամ և ես սրտած եմ կատա-  
րեալ խաւարով. բայց սա զիշերային խաւար չէ, այլ  
լեռնային մի մօմնետ, որին անկարող եմ համեմա-  
մատել մի այլ բանի հետ՝ միտքս պարզելու, ցան-

կացածս արտայայտելու համար: Այլևս բան չեմ  
տեսնում, նոյնիսկ ձիաները միրաժի նման աղօս  
կերպով են նշմարւում:

Զգում եմ, թէ ինչպէս մի տեսակ թաց փոշի է  
մաղւում երեսիս: Գոռում-գոչումը, աղաղակն ու ճայ-  
թիւնը դարձեալ շարունակւում են, սակայն, օ՛ դար-  
մանք, այս բոլորը կարծես ներքև, ստորերկրեայ  
աշխարհումն է կատարւում: «Գուցէ անպերի մէջ  
եմ գտնւում», անցնում է մտքովս Երրեմն մօտիկից  
են ահանջիս հասնում մարդկանց ձայներ ու անիւնե-  
րին ճռչիւնը «Քաշվիր աչ կողմ», լսելի է լինում  
ձիավարիս միակերպ ձայնը:

Յանկարծ ցնցւում է մեր սայլակն ու կանգ առնում:  
— Խո՞ւլ ես, որ չես լսում «քաշվիր» բառը:  
այ, սանըն... աւերացրեց ձիավարս Ղազանի թաթարի  
բարբառով, մտրակի հարուածը հասցնելով մէկին:  
Նա էլ փոխադարձ միքանի յիշոցներ ուղղեց սրա  
հասցէին օտերէն, միւնոյն ժամանակ աշխատելով ա-  
ղատել իր երկանիւ սայլը: Անցնում է դարձեալ քա-  
ռորդ ժամ և այլևս անձրևի նշոյլն անգամ չի նկատ-  
ւում, բայց զգում եմ թէ ինչպէս կրկին թրչւում եմ:  
Օղը ցուրտ է և վերին աստիճանի խոնաւ հազուստս  
սաստիկ ծանրացել է, ուսերս, մէջքս ցաւում են:

\*

Խաւարն անհետացել է: Արևի մեղմ ճառագայթները թափանցում են նօսր մառախուղի միջով ու ախորժելի ջերմութիւն պարգևում բնութեան: Ահա լեռների զազաթները, ահա նորից հսկայական ապառաժները, որքան արցունքներ են թափում նրանք, բայց այդ ուրախութեան արցունքներ են: Բնութիւնն սկսում է ժպտալ: Թերէքն անգամ, որ անյայտացել է անտառների մէջ, այս միջոցին պարելով ու ծիծաղելով է մեզ յիշեցնում իր գոյութիւնը: Ահա երևում են լեռների զազաթներին կպած ինչ-որ կէտեր, որոնք նման են ծիծեռնակների բներին. այնտեղ անշուշտ մարդիկ են ապրում: Թռչունները ուրախ-ուրախ սլանում են մաքուր օդի մէջ զանազան ուղղութեամբ: Զիւնները նոյնպէս աշխոյժ ու զուարթութիւն են ստացել: Ճանապարհի վրայ անձրևից գոյացած ջրերը պլպլում են արևի ճառագայթների տակ: Ո՛րքան գուրեկան է շունչ առնել այս մաքուր օդի մէջ, որքան ախորժելի է այս բուպէն: Այլևս չեմ ջանկանում յետ նայել, ուր անդունդների մէջ դարձեալ շարունակում է հոգեմաշ տեսարանը: Մօտեցել ենք Կօրի կայարանին. դա հեռուից փայլում է սպիտակ գոյներով:

Ո՛րքան ուրախ եմ, որ շուտով հանգիստ եմ առնելու այնտեղ:



Քանի անգամ զրիչ եմ վերցրել՝ Արարատեան դաշտավայրի մասին միքանի խօսք զընլու նպատակով, այն է՝ արտայայտելու այն սպաւորութիւնը, որ ստացել եմ սրանից եօթ տարի առաջ, երբ առաջին անգամ զնացի այն կողմերը: Այնուհետեւ ուրիշ անգամ եւս առիթ եմ ունեցել այցելել հին աշխարհը, բայց այն առաջուայ զրաւիչ ու քաղցր սպաւորութիւնն այլևս չի կրկնուել: Ի՞նչ է պատճառը— դժուար է ասել: Ինչ ուրեմն մնում է հաղորդել իմ անցեալ սպաւորութիւնից մնացած յիշողութիւնները:

«Մի փոքրիկ ամանով շուր բեր այնտեղից ինչ համար, հարկաւոր է ինձ», անդադար խնդրում էր ամենամօտիկ ընկերներիցս մէկը, երբ ես Թիֆլիզում պատրաստում էի մեկնելու դէպի Մասիսի շրջակայքը: Խօսք տուի կատարել նրա այդ տարօրինակ ցանկութիւնը և ծանապարհուեցի մի ուսանող ընկերիս հետ, որ նոյնպէս ցանկութիւն ունէր ինձ նման ծանապարհորդելու:

\*

Ամբողջ ութ օր Ս. Էջմիածնում մնալուց և այնտեղի յուլիս ամսուայ հռչակուած մոծակների ծանկերում տանջուելուց յետոյ շարունակեցինք մեր ուղին



դէպի Արագածի լանջերը, ուր փռուած են Հայկական  
 բազմաթիւ դիւղեր: Մոռացայ ասելու, որ Ս. Էջ-  
 միածնում ութ օր շարունակ քնում էինք Ղազարա-  
 տատի կտուրի վրայ, որտեղից յոյս ունէի լուսադէ-  
 մին, արշալոյսի միջոցին, Աբարատի գազաթը տեսնե-  
 լու, բայց դժբաղդարար ասպարդիւն անցաւ յոյսս:  
 Բոլոր ժամանակ ծածկուած էր թուխ ամպերով-  
 կարծես վճռած էր չարժանացնել մեզ իր տեսու-  
 թեանը: Սրա փոխարէն ևս էլ, ընկերս էլ իւրա-  
 քանչիւր առաւօտ վեր էինք կենում մի-մի նշաննե-  
 րով, որ մոծակները չէին զլանում դրոշմել մեր  
 զէմքերին: Յիշում եմ, ինչպէս մի օր առանց ծիծաղի  
 անկարելի էր լինում նայել ընկերիս զէմքին: Նրա  
 ձախ աչքն ուռել էր և բոլորովին ծածկուել, իսկ  
 շրթունքների աչ անկիւնը ծռուել էր ծիծաղաշարժ  
 կերպով: Հայելու մէջ իրան տեսնելուն պէս՝ փակուեց  
 սենեակում և որոշեց ամբողջ օրը դուրս չգալ: Նրա  
 ճակատին մի անսպասելի տխրութիւն էր նկատուած՝  
 երևի այն պատճառով, որ դրա նախընթաց օրը  
 մտադրուել էր այցելել դրատունն ու թանգարանը,  
 իսկ այդ տեսակ սյլակերպութիւնը թոյլ չէր տալիս  
 նրան տանից դուրս գալու: Նա խոյս էր տալիս  
 մարդկանց հանդիպելուց, ինչպէս մի օրիորդ:

\*

Մողնու Ս. Գէորդ մենաստանը գտնուում է Արագածի ստորոտում մի բարձրաւանդակի վրայ: Արևը արդէն վաղուց մայր էր մտել և խաւարը տիրել էր ամեն տեղ, երբ ընկերներինս հետ միասին յողնած ու ջարդուած հասանք այդ սրբավայրը: Խաւար ամայութեան մէջ, խաւար ֆօնի վրայ նկարուում էր աւելի խաւար ուրուաղծով հինաւուրց երեւելի վանքը, շրջապատուած ամբապինդ շրջապատով: Մութ գիշերային անդորրութեան մէջ, ուր զեփիւռի սլալոցն անդամ չէր լսոււմ, այս սեփն տուող ահագին մարմինը մի առանձին տպաւորութիւն էր գործոււմ, որ սովորաբար մարդիկ անուանում են խորհրդաւոր: Բացի ջերմեռանդութեան և ակամայ երկիւղի ըզգացմունքից, կայ նոյնպէս մի ուրիշ զգացմունք, որոնք միախառնուելով իրար հետ, այս տեսակ դէպքերում աղբում են մարդու հոգու վրայ:

Մենք ձիաներից իչած՝ կանգնած էինք պարսպի փակուած դռան մօտ: Մեր ամենքի վրայ լռութիւն էր տիրել: Վեց հոգի էինք. երեք երիտասարդ ուսանող, մի վարդապետ, մի ուսուցիչ և ես: Վերջապէս հայր սուրբն ընդհատեց մեր լռութիւնը՝ երեք անգամ զարկ տալով դռանը, որին ներսից յաջորդեց դամփռի հաշոցը:

— Ո՞վ էք, լսուեց անմիջապէս մի ձայն և մեզա-

նից պատասխան ստանալուց յետոյ բացուեց ծանր  
դուռը: Վանահայրը սիրալիր ընդունեց և ունեցածը  
չխնայեց մեզ հիւրասիրելու համար անպաճոյճ սե-  
նեակուձ, աղօտ ծրագի տակ: Պարզ և համեղ ընթ-  
րիքից յետոյ, վարդապետը հոգաց մեր անկողին-  
ների մասին և բարի զիշեր մաղթելուց զատ նաև  
խոստացաւ, համաձայն իմ խնդիրքի, զարթեցնել  
առաւօտեան ժամը չորսին՝ արեւածագը տեսնելու  
համար:

\*

Լուսադէմ է: Ամենքս բարձրացել ենք վանքի  
դանդակատունը և հաղիւ տեղաւորուելով զանգակնե-  
րի տակ, սպասում ենք արեւածագին: Մթութեան  
բազմաթիւ լուսատուները ամբողջ զիշերը ուրախ-  
ուրախ ժպտալուց ու շրջելուց յետոյ քուն են մտել  
Նրանցից միքանիսը դեռ էլի արթուն են, բայց զու-  
նսթափ ու դայկացած, հերթով մօտենում են իրանց  
վախճանին: Անդնդային հեռաւորութեան մէջ հաղիւ  
է նշմարւում ահարկու ուրուականը: Դա իր զլուխը  
հասցրել է երկնքին՝ պատառ-պատառ ու ցիրու-  
ցան անելով ամպերի զնդերը, որ իրան չխանգարեն,  
իսկ թևերը տարածել է լայնատարած երկրի վրայ,  
ուր թուում է թէ երկիւղածութեամբ հնազանդւում

է նրան բնութեան բոլոր հրաշալիքները և նրա հրա-  
մանի ներքոյ ամենայն ինչ ննչուծ է: Կարծես ահ  
ու երկիւղ է կրուծ նրանից և՛ երկնային զօրութիւնը  
իր որոտութենքով ու փայլակ-կայծակով, և երկրա-  
շարժը իր բոլոր արհաւիրքներով: Ասես թէ դա  
հսկուծ է ամբողջ տիեզերքի վրայ, զիտելով երկրա-  
գնդի բոլոր անկիւնները: Այս կախարդական ուրուա-  
կանը ծածկուած է թափանցիկ գոլորշուց հիւսած  
սաւանով: Կաշկանդուած ու լարուած ուշադրու-  
թեամբ նայուծ են դէպի այդ կողմը: Ծնչառութիւնս  
համարեա դադարել է: Երկնքի մոյզ-կապուտակը  
կամաց-կամաց բացուծ է և միփոքր շառագունուծ:  
Ուրուականը աստիճանաբար, ամեն մի բուպէից յե-  
տոյ տեսանելի է դարձնուծ իր դէմքը և նրա հետ  
ներդաշնակաբար ամբողջ բնութիւնը արամադրուծ  
է կերպարանափոխելու. սակայն լռութիւնն ու  
ամայութիւնը դեռ ևս մնուծ է անփոփոխ: Երկիրն  
ամբողջապէս պատած է թանձր մշուշով, որի միջից  
հեռուծ, շատ հեռուծ մի ֆանտաստիկական էակ  
դուրս է ցցել իր սուր գլուխը՝ հսկայի երեսին նայե-  
լու, բայց ամօթխածութեամբ ցածից դէպի բարձր:  
«Մեծ-Մասիս և Փոքր-Մասիս» կրկնուծ են միքանի  
անգամ մտքուծս, «Նոյ նահապետի տապանը չէր  
կարող սրան հաւասար մի ուրիշ ապաստարան

զանել աշխարհումս հանգիստ առնելու համար: Արարատի զազաթի վրայից անշտապ կերպով վերանում է բարակ զոլորչին և ցնդում օդի մէջ: Այդ միջոցին իջնում է նրա ճակատին հրաշէկ մի կայծ և զգուշութեամբ տատանւում է: Ամենքս զարմացած հայեացքներով նայում ենք միմեանց երեսին և չենք յանդիմանում ձայն հանելու: Տեսարանը հրաշալի է և խորհրդաւոր: Վսեմ զազաթը կամաց-կամաց բորբոքւում է, բայց բորբոքւում է այնքան մեղծ, այնքան հրապուրիչ կերպով, որ չի կարելի երեւակայել սրա նման զմայլեցուցիչ մի ուրիշ բան: Այս երկնարժան տեսարանը մի բոպէի չափ է միմիայն տւում: Կայծը սկսում է ընդարձակուել և աստիճանաբար դունատուելով ոսկէգօծում է լեռան հպարտ ալեզարդ ճակատը և տեսանելի է դարձնում նրա հաղարաւոր կնճիռները:

Հինաւուրց ծերունին՝ որի դէմքի ծալքերը այս աստիճան մռայլ են, կարծես բազմաթիւ տխուր անցքերին վկայ լինելու պատճառով, երբեմն, շատ սակաւ, միմիայն լուսադէմին պատառում է իր մշտական զգեստը, բաց է անում աչքերը, նայում է իր շուրջը, նայում է ամբողջ աշխարհին և դժգոհութեամբ նորից ծածկւում անթափանցելի սև քօղի տակ:

Սա է նրա ուրախ բոպէն: Նա նախ և առաջ

նայում է դիմացի հարեանին, սպիտակահեր Աշագածին և ողջոյն տալու հետ միասին փայլեցնում է նրա քնաթաթախ դէմքը: Ապա նայում է ցած և իր անբաժանելի յաւիտենական ընկերին արթնանալու հրաման է տալիս: Այս տարօրինակ ժամին հեռուից դանդի մերամաղձոտ ձայնը տատանուելով տարածւում է օդի մէջ և անցնելով տափարակ դաշտի վրայով հանդուում մի անցայտ անդ: Արարատեան դաշտը քնից սթափւում է: Երկնքից իշած նօսր գոլորշիները՝ գիշերային խաւարին մայր երկրի հետ դրկախառնելուց ու արցունքներով թրչելուց յետոյ, շտապում են նորից երկինք բարձրանալ, սակայն ծանապարհին արեւի ծառագայթներին հանդիպելով շփոթւում են: Չայրուելու համար պատառ պատառ են լինում, խճրերի են բաժանւում և Մասիսի կուրծքի վրայ սողալով, նրա մօտ փրկութիւն են որոնում: Լայնատարած հովիտը, որի համար կարծես դոյութիւն չունեն չափ ու սահման, ամփոփել է իր գրկում բազմաթիւ աւաններ ու գիւղեր, որոնց միջից կապոյտ ծուխեր են բարձրանում և յիշեցնում մարդկային ցեղի դոյութիւնը: Ահա այստեղ, հեռու, ուր մթնոլորան է տիրում, ուր մահկանացուի աչքը անզօր է սպիտակը սևից որոշելու, ուր ծերուկ Մասիսը սահման է դրել իր և տափարակ



երկրի մէջ, մի ի՛նչ որ բան է նշմարուած ոսկեթելի նման, երևի այդ Արաքս գետն է...

Բայց երբ դաշտի երեսին փռուած վաղուց անցեալի յիշատակները, այդ մամռապատ, քարուքանդ եղած ճարտարասպետական արտադրութիւնները նոյնպէս մտածաստեղծաց ազատուած են, ինձ թւում է թէ նրանք աղերսողի հայեացք են զցում վեհ ալեւորի վրայ, որից նրա սիրտը շարժուած է, սակայն կարծես իր վշտալի արցունքները չըցոյց տալու համար մօտ է բերում իր մշտական սզազգեստը և վարագուրուած է նրա տակ:

Տեսարանը փոխւում է: Այժմ ամեն բան նկատելի է դառնում, ամբողջ բնութիւնը կեանք է ստանում և գեղեցկանում:

Ինչ որ մի քանի բոսայէ առաջ Մասիսի վսեմութեան երկիւղից կուչ էր և կած և չէր համարձակուած յիշեցնել իր գոյութիւնը, այժմ գլուխը բարձրացրած՝ պարծենում է իր ձևով ու գիրքով, շնորհքով ու տեսքով: Ահա աչ կողմ շարքով կանգնած են խոտի զնդաձև դէղեր, որոնցից մէկի տակը խեղճ զիւղացին փռել է իր սև ետինջին և խուրջինը գլխի տակ դրած ու ոտները ձգած՝ ննջում է, իսկ նրա ձին դէպքից օգուտ քաղելով խրել է իր գլուխը դէղի մէջ և ուտում է ուրիշի սեփականու-



Թիւնր: Ահա վերև երկնքի կապուտակութեան մէջ  
սևափետուր մեծ թռչունը լայն թևերը տարածած  
լողալով շրջաններ է կաղմուծ:

Ահա ձախ կողմից երկու գիւղացի անասուն-  
ները քշելով մեծ ճանապարհից շեղուած դաշտի մի-  
ջով անցնում են և երբ մօտենում են սրբատեղին,  
զլխարկները վերցնում են ու շերմեռանդութեամբ  
երեսները խաչափնքում: Հեռու մի աւերակի մօտ  
մի բուռն կապոյտ ծուխ է դուրս ցայտում, որին  
հետևում է հրացանի ձայթուփն: Մեծ ճանապարհը՝  
անկանոն գծով, վարուցանքսով ծածկուած դաշտը  
ձեղքելով զլխիվայր զնում հեռանում է և մի ինչ  
որ աւանի մօտ իր հետքն կորցնում: Մի տեղ, հէնց  
դաշտի մէջտեղում, Ս. Էջմիածնի արհեստական ան-  
տառը մշուշից աղատուած լինելով, արդէն պարզ  
երևում է: Ընդարձակ հովիտը գոյնզգոյն շերտերով  
է ծածկուած: Բլուրները յաշորդում են բլուրներին,  
գիւղերը՝ գիւղերին և այսպէս հեռանում են մինչև  
հորիզոնը և այնտեղ հանգչում...

\*

Միևնոյն օրը մեր փոքրիկ խումբը գեղեցիկ  
տալաւորութեան տակ շարունակեց իր ճանապարհը:  
Անցանք Աշտարակի, Օշականի, Բաշապարանի և էլի

շատ գիւղերի միջով, այցելեցինք Նառիճոյ վանքը և այսպէս հասանք Ալէքսանդրօպօլ: Այնտեղ երկու օր առաջնորդարանում հիւրասիրուելուց յետոյ, ինքք յաջորդ հայր սուրբը, նոյնպէս մի քանի երիտասարդ միանալով մեզ հետ գնացինք Անի: Կանգ եմ առնում այստեղ: Դարձեալ շատ բան կայ խօսելու, սակայն թողնում եմ այս անգամ, յուսալով որ մի անգամ կրկին առիթ կունենամ պատմելու այս ճանապարհորդութեան շարունակութիւնը:

Խօսքս լրացնելու համար պէտք է աւելացնեմ, որ խոստմունքիս համաձայն Ախուրեան զետից մի շիշ ջուր վերցրի և հետս տարայ: Երբ վերադարձայ Թիֆլիս, դիմաւորեց ինձ բարեկամս ու նրա առաջին խօսքն այս եղաւ. «Բերի՞ր ջուրը»: Երբ իրան յանձնեցի արդէն հօտած ջուրը, անմիջապէս մօտեցրեց ամանը բերանին ու կուշտ խմեց, յետոյ Ֆնացածը ամեն իր գլխին ու երեսին: Նա այս դործողութիւնն այնպէս լուրջ կատարեց, ինչպէս մի սուրբ խորհուրդ և բարոյապէս վարձատրած աչքերով դիմեց ինձ.

— Ծնորհակալ եմ:

Տեղս ուրիշը լինէր զուցէ չկարողանար ծիծաղը զսպել:

## VII

Մենք գնում էինք Անի: Այժմ մեր խումբը բա-  
 ւական մեծացել էր, այնպէս որ Ֆուրզօնում չտե-  
 ղաւորուելու պատճառով մեզանից միքսնիսը ձի էին  
 նստել: Ես տեղաւորել եմ Ֆուրզօնի ետեւի մա-  
 սում, ուր շատ անյարմար է, երկու կողմիցս էլ սեղ-  
 մուած եմ: Այ կողմս նստած է ու ինձ վրայ յե-  
 նուած հաստմարմին ընկերս, որին յաճախ բռթում  
 եմ, յիշեցնելով, որ ինքը բաւական ծանր է: Ի՞նչ  
 անէ խեղճը, հակառակ իր ցանկութեան մոռացու-  
 թեան մէջ է ընկնում, քանի որ խօսել սիրում է,  
 երբ խօսակից ունի, իսկ այս անգամ վիճարանու-  
 թիւններից այնպիսի աղմուկ է տիրում Ֆուրզօնի  
 մէջ, որ խլանում են ականջներս: Զախ կողմս դրած  
 է փայտի մի կոպիտ արկղ, որի վրայ դրած է զի-  
 նով լի տիկը, որ բոլոր ժամանակ շարժողութեան  
 մէջ է: Դիպչում է նոյնպէս Ֆուրզօնի տախտակնե-  
 րին: Նկատում եմ միւս ընկերիս, որ մի ըռպէ վեր-  
 կենայ իր տեղից, որովհետեւ իր ամբողջ ծանրու-  
 թեամբ նստել է ոտիս վրայ ու կատարելապէս թըմ-  
 րեցրել: «Անկարելի է վեր կենար», պատասխանում  
 է նա, երկու ոտներս էլ այս հայվանի տակն են:

1883 թ. ամառուայ ամենաշոք օրերից մինն է: Մեղանից ամեն մէկը անդադար հովհարուած է իր զլխարկով, կամ թաշկինակով: Կարօտել ենք շրի, ծարաւք յաղթել է մեզ: Խեղդուած ենք աօթից, ֆուրգօնի սպիտակ կտաւի ծածկոցը չի կարելի բարձրացնել, որովհետեւ այդ մի փոքր աղատուած է մեզ արեւի այրող ճառագայթներից: Մեզ հետ միասին գնուած են մեծ քանակութեամբ ճանճեր, որոնք խուճր-խուճր բաժանուած նստած են մեղանից մէկի զլխարկի, միւսի մէջքի վրայ և այլն: Նրանցով շատ է զբաղուած մեզ հետ զանազ մի 14-15 տարեկան տղայ: Մի երկու հարուած էլ ինձ է հասցնուած ճանճեր բռնելու ժամանակ: Մեր մէջ գտնուած են բազդաւորներ, որոնց նախանձուած եմ ի սրտէ. նրանք քնած են հանդիստ կերպով և չեն արթնանուած, մինչև անդամ երբ ճանճերը ձգնուած են նրանց քթի ծակերը մտնելու: Մօտենուած ենք մի հայ գիւղի և նրա միջով անցնելիս կառքը կանգ է առնուած: Գոյն-զգոյն շորերով կանայք շտապուած են դէպի իրանց քարաշէն անշուք տնակները և ծածկուած անհամեստ աչքերից: Նոյն տնակներից դուրս են վազուած օտարօրիկ ու կիսամերկ երեխաներ ու շրշապատելով մեզ, հետաքրքրութեամբ նայուած են մեզ վրայ ու ժպտալով խօսակցուած միմեանց հետ: Մերունի

գիւղացիին, ջրի ամանը ձեռքին, արագ քայլերով մօ-  
 տենում է մեզ և «Աստուած օգնական» ասելով,  
 դնում է գետնին իր ահագին մորթէ գլխարկը, լըց-  
 նում է ջրով պղնձէ թասն ու առաջարկում նախ մեր  
 ճանապարհակից վարդապետներին և ապա հերթով  
 մեզ, մեր հասակի համեմատ Թուրքօնը նորից շարժ-  
 ւում է և դարձեալ շարունակւում է ընդհատուած  
 աղճկալի վիճարանութիւնը: Մնտանելի խրխռոցը,  
 զանգուլակների ձայնն ու ձիերի ոտքի արօփիւնը  
 ներդաշնակցում են նրան: Տաքացած փոշին դեղ-  
 նադոյն գոլորշիով բարձրանում է ու շրջապատում  
 մեզ: Միայն ես եմ որ մասնակից չեմ վիճարանու-  
 թեանը, գլխացաւս բռնել է: Փոքր առ փոքր մեղ-  
 մանում է խրխռոցը և աւելի լսելի է դառնում խօ-  
 սակցութիւնն ու աղճուկը: Վերջապէս ձիերը կանգ  
 են առնում և նրանց հետ ամենքն էլ լռում են:  
 «Գետին հասանք, Ախուրեանին մօտեցանք», լսելի  
 է լինում միմեանց ետեւից: Զիաւարը իջնում է, մօ-  
 տենում է ձիերին և առանձին խնամատարութեամբ  
 ու քնքշութեամբ ձեռք է քսում ճակատներին, ուղ-  
 դում է բաշները, սրբում է աչքները ու ճարպիկու-  
 թեամբ նորից բարձրանում նստում է իր տեղը, յե-  
 աոյ վերջնում է իր գլխարկը, որ բոլոր ժամանակ  
 ծուռ էր դրած ու երեք անգամ խաչահնքելուց յե-

տոյ, խրախուսուած է ձիերին, տալով նրանց զանա-  
զան ածականներ ու զգուշութեամբ թողնուած է  
նրանց գէպի գետը: Ախուրեանը ընդարձակ դաշտի  
միջով անցնելիս, տարրեր պտոյաներով ու բազմա-  
տեսակ ձիւղաւորուած, կղզիներ ու թերակղզիներ  
գոյացնելով, անընդհատ միանուած ու բաժանուած է:  
Նոսանքը ոչ դանդաղ է և ոչ կատաղի, ձայնը ոչ  
ողբ է և ոչ սպառնալիք: Ձիերը կամաց-կամաց մրտ-  
նուած են ջրի մէջ ու ծածկուած կիսով չափ: Գետը  
առ ժամանակ շփոթուած է, փրփուրն ու ալիքները  
ճնշուած են իրար, որով և խանգարուած է հոսանքի  
միակերպ խաղաղ ձայնը: Մենք անշտապ կերպով  
վնուած ենք ջրի միջով, բայց որքան մօտենում ենք  
ափին, այնքան արագանում է ընթացքը: Ձիավարը,  
որ վերջին մի երկու ըռպէն յանձնել էր մեր ամն-  
քիս վիճակը ազնիւ անասուններին, ափին հասնելուն  
պէս կարծես սթափուած է երկարատե թմրութիւ-  
նից: Յանկարծ շարժուած է տեղից, արտասանում է  
միքանի խօսք, որոնց մէջ զգացւում է և հայհոյանք,  
և փաղաքշանք: Հարուածում է մտրակով աչ ու ձախ  
բոլորովին անտեղի, ասես թէ զրանով ցանկանում  
է ցոյց տալ մեզ իր շնորհն ու արհեստը երկիւղալի  
ըռպէներում: Շուտով դուրս ենք գալիս ջրի միջից:  
Դարձեալ նորոգուած է ընդհատուած խառն խօսակ-



ցութիւնը, որից շատ քիչ բան է հասկացւում: Իտար-  
ձեալ տաքացած փոշին, արևի այրող ճառագայթ-  
ներ, աղմուկ, բայց Սնին դեռ ևս չի երևում: Աջ ու  
ձախ երևում են տափարակ դաշտեր, լեռնադաշտեր,  
բլուրներ, որոնց վրայ անկանոն կերպով ցիբուցան  
են արուած գիւղեր ու արտեր: Քրտնաթաթախ  
դէմքերով զիւղացիք մի տեղ հստում են, միւս տեղ  
կախում. իսկ մեծ մասամբ ցորենի հասկերը գլուխ-  
ները թեքած սպասում են գերանդիին:

\*

Արևը կամաց-կամաց թեքւում է դէպի երկիր  
և իր տակ գտնուած լեռների վրայ բոցավառ կայ-  
ծեր է մաղուծ: Նա կարծես մեղանից հեռանում է  
և մենք այնքան այրուելուց յետոյ ազատուծ ենք:  
Սյժմ մեր առաջ նկատելի է լինում հորիզոնաձև տա-  
րածուած մի սլատ, որ բոպէ առ բոպէ մեծանում է  
և բարձրանում: Մենք դիտում ենք այն սլաքը. այդ  
Սնիի պարիսպն է: Վիճարանութիւններ ու դատո-  
ղութիւններ միանդամից վերջանում են: Զիավարին  
ստիպում ենք որ «քշէ»: Հիմա աւելի զգալի է նե-  
ղուածքը, մենք անհամբեր սպասում ենք ֆուրգո-  
նից շուտով դուրս գալուն: Դարձեալ միքանի բոպէ  
և մենք արդէն կամարաձև ընդարձակ մուտքով ան-



ցել ենք և պարսպի մէջն ենք զտնուում: Բայց մենք միայնակ չենք: Մեզանից մի փոքր առաջ հասել են Գէորգեան ձեմարանի աշակերտները իրանց տեսչի հետ: Նրանք իրանց արևելեան ճաշակով դոյնզդոյն ներկած ֆուրդօնը մի կողմ թողած, կանգնել են մի աւերակի մօտ և խմբով երգում են «Անի քաղաք նստեր կուլայ» երգը: Ես երբէք այնպիսի անախորժ տպաւորութիւն չեմ ստացած, ինչպէս այս անգամ: Բայց ոչ թէ նրանց երգն է անդուրեկան, բոլորովին ոչ: Պատճառը երևի այն է, որ նրանց երիտասարդական աշխոյժ կազմուածքն ու հայեացքը, եռանդով լի երգի հետ միասին ներկայացնում է մի հակապատկեր այս շրջապատող աւերակների, ուր մըշտընչենաւոր վայրենացած ամայութիւնն է տիրում: Այդ տխուր երգը ոչ միայն չէ ներդաշնակում տարօրինակ տեսարանին, այլ վրդովում է նրա յաւիտենական հանգիստը, որ հաստատուել է դարերի ընթացքում: Այս ընտիր ու հազւագիւտ ճարտարապետական յիշատակները, որոնք կենդանի մարդկանց արուեստովն են կառուցուած, այժմ նոյնպիսի կենդանի մարդկանց դոյութիւնը խանգարում է նրանց անդորրութիւնը: Հեռանում եմ ընկերներիցս ու ակամայ զգոյշ քայլերով անցնում զետնի մէջ թաղուած քարերի վրայով ու մօտենում մի մատու-

ուի մնացորդին, որի միմիայն մի քառորդը դեռ էլի  
ամուր կանգնած է, իսկ երեք քառորդը սյստեղ և  
եթ քարերի ու հողի միքանի կոյտերի են փո-  
խուել: Սրանց միջից ստեպ-ստեպ դուրս են ցայ-  
տում խլէզներ, որոնք իրանց գոյնով չեն զանազան-  
ում փլատակների գոյնից և մի ակնթարթում անց-  
նում են քարից քար, կանգ առնում, չում իրանց  
աչիկները ուղղակի դէպի մայր մտնող արեգակը և  
դարձեալ յետ վազում թագնւում: Որքան յարմար  
դալիս է այս աննշան արարածների ներկայութիւնը  
անկենդան կուտակների հետ, որքան ներդաշնակու-  
թիւն...

Արևը մեծացած ու կարծրած հասել է հորի-  
զոնին ու այնտեղ արևան ծով է կազմել: Ամբողջ  
շրջակայքին մեղմութիւն է տիրել: Աւերակների եր-  
կայն ստուերները տարածուել են անհարթ գետնի  
վրայ, ուր թռչկոտում են մորեխները և ուր սպի-  
տակ ու կարմիր, կասոյտ ու դեղին թիթեռները  
անցնում են ծաղկից ծաղիկ:

Վանահօրը իր աղքատ բնակարանի հետ միա-  
սին անհանդիստ ենք արել: Շատ պարզ երևում է,  
որ նրանք սովոր չեն այսպիսի մեծաքանակ անկոչ  
հիւրերի, որոնք անդադար մածուն են պահանջում:  
Օրը մթնում է: Մենք ամենքս հաւաքուում ենք վար-

դապետի բնակարանը: Ամբողջ երեկոն պարելով, ծի-  
ծաղելով և ուտելով անցկացնելուց յետոյ, քնելու  
ենք պատրաստուամ: Մէկը փալաս է դտել ու փռել  
սենեակի յատակի վրայ, միւսը իր եափունչու մէջն  
է փաթաթուել, երրորդը իր վերարկուի վրայ է  
դրել յոյսը և այսպէս ամենքս էլ պառկում ենք և  
անշուք միակ ճրագը հանդչում է: Մի անկիւնից  
լսելի է լինում ծածուկ քչփչոց, որին հետևում է  
և զսպած ծիծաղ, միւս տեղ երևում են ծխախոտի  
կրակներ: Այ կողմիցս հաղիւ հասնում է ականջիս  
չերմեռանդ աղօթք, այնտեղ պառկած են հայր-սուր-  
բերը: Դարձեալ մի քառորդ ժամ և սենեակում տի-  
րում է խաղաղութիւն: Արթուն եմ միմիայն ես:  
Դիտաւորութիւն չունեմ քնելու, սպասում եմ կէս  
դիշերին:

\*

Վեր եմ կենում տեղիցս, մեծ զգուշութեամբ  
բաց եմ անում սենեակի դուռը և դուրս դալիս:  
Բնութեան մէջ տիրում է անթափանցելի խաւար,  
երկնքի երեսը ծածկուել է սև ամպերով: Աչքս ան-  
ղօր է բան տեսնելու, շուրջս տիրում է միակերպ  
սև տարածութիւն: Երկինքն ու երկիր խառնուել  
են, իրարից չեն որոշուամ: Հասնում է ականջիս ծի

խուլ ստորերկրեայ ձայն. դա իր մելամաղձոտ միակերպութեամբ ճնշում է սիրտս: Այդ Ախուրեանն է, որ ժայռոտ անդունդների միջով անցնելիս, այսպիսի դիշերներ անդամ չէ լուծւած: Յանկարծ դուրս է պրծնում խաւարի միջից հրեղէն ժապաւէնը և վիրաւորուած օձի նման միքանի պտոյտներ անելուց յետոյ հանդուլ է: Մի քանի վայրկեանից յետոյ լուծւած է հեռաւոր որոտուճն և նորից ամենայն ինչ խաւարում է: Կանգնած եմ անշարժ ու անձայն և նայում եմ անվերջ սև քաօսի մէջ: Դարձեալ դուրս են ցայտում միմեանց ետևից հրաշէջ բոցերը, լուսաւորում են երկիրը և բոպէսպէս հանդուլ: Անսպասելի կերպով սաստիկ քամին մռնչալով անցնում է մօտովս, իր հետ տանելով փոշի ու աւաղ, խլում է դլխարկս ու անհետացնում: Քամին աստիճանաբար սաստկանում է, փչում է ամեն կողմից, պտոյտներ է անում, երբեմն շւացնում է, երբեմն մռնչում: Առժամանակ դադարելուց ու լռելուց յետոյ, մի ուժգին հարուածով դղրդւում է եթերքը, աչք կուրացնող հրարխային լոյսը տարածւում է երկրի վրայ, ոչնչացնում է մթութիւնը և տեսանելի դարձնում երկինքն ու երկիրը, մանաւանդ երկինքը, որտեղից լսւում է թնդանօթի խլացուցիչ ձայնը իր դադանալի արձագանքի հետ: Երկիրը շարժւում, դողում է

և կարծես երկիւղից կուչ գալիս: Սյս վայրկեանին բացուում է աչքիս առաջ մի անսովոր տեսարան, ահա՛ այժմ միայն տեսնում եմ Անին: Բնութեան այսպիսի խորհրդաւոր ճղնաժամին նա ցոյց է տալի իր զոռոզ դէմքը, բոլորովին չքաշուելով մահկանացուներից արհամարուած իր թշուառ վիճակից: Սյս կարծատե տեսարանը այնպիսի տպաւորութիւն զործեց վրաս և այնպէս թափանցեց ուղեղիս մէջ, որ անկարող եմ երբեւիցէ մոռանալ:

Ի՞նչ խրոխտութեամբ է բարձրացրել սիւնաձև ահագին աշտարակը իր զլուխը դէպի երկինք և դիտում իր շուրջը և ի՞նչ տխուր կերպարանք է ընդունում, երբ նրա աչքին է ընկնում երբեմն իր նման կանգուն ու վսեմ, իսկ այժմ գլորուած ու փշրուած միւս աշտարակը: Ահա՛ աչ կողմը լայնատարած ու մէջքն ուռցրած միջնաբերդը, որի խնամքին են յանձնուած մատուռների ու զանազան շինութիւնների կմախքները և որի ետևում բացուած է ժայռոտ մութ անդունդը, ուր հոսում է տխուր անցեալի միակ կենդանի մնացած ականատես Ախուրեանը: Ահա և ձախ կողմը աննման սաեղծագործութեան ուրուական-մայր-եկեղեցին: Ինչպէս մարդկային գեղեցիկ մարմին, բայց զրկուած երբեմն պսակազիր գլխից՝ խորշելու չափ այլանդակ է: Նոյնպիսի

տպաւորութիւն է զործում և մայր-եկեղեցին: Նա զրկուել է կաթողիկէից, ամենազլխաւոր զարդից, որ առհասարակ տաճարի փառքն ու վսեմութիւնն է և որ երկիւղածութիւն ու Աստուածապաշտութիւն է ներշնչում հաւատացեալներին ու անհաւատներին: Մայր-եկեղեցին, որի անունը սերունդից սերունդ-անցնելով Ֆնացել է անխախտ, կանգնած է վիրաւոր ու քայքայուած մարմնով և ցոյց է տալի զեղատեսիլ քանդակներ ու արձանագրութիւններ, իրրև միակ հետքեր անցած-գնացած անվերադառնալի պարծանքի: Ահա հեռում ձորի զլխին նոյնպիսի խղճալի պատկեր. այնտեղ իրանց բարձրութիւնից վայր ընկած ու կործանուած են արքայական պալատները, որոնց նրբարուեստ պատերի մէջ երբեմն իշխողների խրոխտ ձայնը յաւիտենական քունն է մտել: Դա նման չէ ոչ տխուր զերեզմանին, ոչ հինաւուրց քարայրին, այլ այդ մի խղճալի ու վրդովեցուցիչ այլանդակ տեսարան է: Սրանից մի փոքր դէնը, աշտարակից ոչ հեռու երևում է կաթողիկոսարանը: Նրա փլատակների մեծ մասը տարածուած ու ցրիւ է եկած զեանի վրայ: Ողջ է մնացել միմիայն պատուանդանը, այն էլ անշուք ու անարուեստ:

Փայլակ փայլակի ետևից, կայծակ կայծակի ետև-



ւից չեն սպառուում և ես դռնուում եմ մի կախար-  
դական աշխարհի մէջ, որ միւսնոյն ժամանակ և տե-  
սանելի է և անտանելի: Երկնքի խռովութիւնը սաստ-  
կանում է ու սարսափեցնում երկիրը: Ժամանակ  
առ ժամանակ ընդմիջում է փոթորիկը և լսելի է  
լինում անվրդով Ախուրեանի միահնչիւն ձայնը: Աչք  
եմ ածում շուրջս և դարձեալ նորանոր ուրուական-  
ներ են կարծես բուսնում երկրի միջից, եկեղեցի-  
ների, մատուռների, պալատների քարուքանդ եղած  
հետքեր, որոնք իրանց վաղեմի գոյութեան իբրև  
յիշատակ, չեն ցանկանում բոլորովին ջնջուել աշխար-  
հի երեսից: Քիչ հեռու տարածուել է ընդարձակ ու  
հոյակապ պարիսպը, որ դարերի ընթացքում նոյն-  
պէս ենթարկուել է պատժի: Նա՛ որ իր կոչման հա-  
նապատասխան պէտք է պահպանէր իրան խնամքին  
յանձնուած անդին հարստութիւններ, նա՛ որ պաշտ-  
պան պէտք է հանդիսանար երկիւղի և արհաւիրքի  
միջոցին, ինքը նոյնպէս կաթուածահարի նման զրր-  
կուելու է ոյժից: Բայց որքան արուեստ ու ճարտա-  
րութիւն, որքան ռազմագիտական կանոններ են գործ  
դրած սրա կառուցման համար...

Ահա այնտեղ հեռաւոր բարձրաւանդակի վրայ,  
գետի միւս կողմում նշմարուում են զանազան շի-  
նուածքներ, բայց անկարող եմ որոշել նրանց ինչ



լինելը: Նայում եմ դարձեալ շուրջս և տեսնում եմ  
անհարթ չոր գետնի վրայ մաշուած քարեր, մամ-  
ռապատ կոյտեր և այս բոլորն իր միակերպութեամբ  
այնպիսի ձանձրացուցիչ է, ինչպէս անթիւ անգամ  
կրկնուած միւլնոյն խօսքը: Այս ընդհանուր տեսա-  
րանք ուղում եմ նմանեցնել վաղուց մոռացուած  
հինաւուրց գերեզմանոցին. բայց չէ՞ որ գերեզմանո-  
ցում գտնէ մահ է տիրում և կենդանի մարդուս վրայ  
ազդում է տխրութիւն ու ունայնութիւն: Բայց սա  
չէ տխրեցնում, այլ մի տեսակ անբացատրելի վըր-  
դովձունք ու երկիւղ է յարուցանում մարդու սրտի մէջ:

«Այս է Անին», արտասանում եմ ես:

Փչում է նորից կատաղի քամին և աւաղի հետ  
միասին բերում է նաև անձրևի կաթիլներ: Օդը գո-  
լորշիանում, անձրևը սաստկանում է և ես ստի-  
պուած եմ վերադառնալ սենեակ:



## VIII

Կովկասեան հսկայական լեռնաշղթայի ստորոտներին կից, աչքով անհասանելի երկայնութեամբ հարթ մակերևոյթը ծածկուած է կուսական անտառներով: Այս անտառների բոլոր չորս սահմաններից երկուսը պարզ կարելի է որոշել Կախէթի զանազան բարձրաւանդակներից նայելիս: Այդ սահմաններից մինը անվերջանալի լեռնաշղթան է, իսկ միւսը, նրա հակառակը ոլոր-մոլոր դժով հանդիսա հոսող Ալազան գետը: Բայց միւս երկու իրար հանդիպակաց սահմանները ինձ չի առողուել որոշել, թէ և շատ եմ դիտել միջանի զլխաւոր բարձրութիւններից: Ո՞րտեղ են հանդուժ այդ երկու ծայրերը, ինձ յայտնի չէ: Նրանք հետաքրքիր աչքից այնպիսի խորհրդաւոր և զաղանի կերպով են հեռանում ու դաշտային մառախուղների հետ զրկախառնուելով անհետանում, որ յանդգնութիւն եմ համարել իմ կողմից մարդկանցից իմանալու նրանց ի՞նչ տեղ, ի՞նչ գիւղի կամ աւանի մօտ լինելը: Այս ընդարձակ անտառի մի որոշ մասը կոչուում է «Ճիաուրի անտառ»:

Մի անգամ, տարիներ առաջ, ինչ վիճակուեց գիշերն անցկացնել այդ անտառի մէջ:

Դեռ էլի Տնում էր մօտ մի ժամ մինչև կէսօր, երբ ընկերիս հետ միասին կամուրջով անցանք Ալազան գետը—վրացի զիւղացիներից անսպառուղ ու անպէտք համարուած Ալազանը: Հասնելով գետի միւս ափը, իջանք ձիաներից ու մտանք դուքանը, ուր դիմաւորեց մեզ իմ վաղուցուայ ծանօթ Միխակը:

—Օ՛հ, բարով եկաք, համեցէք, քաղցած կը լինիք... չայ կ'ուզէ՞ք... էհ, չայն ի՞նչ կանէք, արդէն ծաշի ժամանակ է. աչքերը արևի կողմ դարձնելով ասաց նա,—լաւ լօքօ ունեմ, դեռ էլի կենդանի է...

—Չայ չենք ուզում, շատ քաղցած ենք, բան պատրաստիր, ասացինք:

—Շարունակեցէք, տղերք. Դաթիկօ, հերթը քոնն է, պատասխանիր թէ շնորհք ունես:

Դուքանի առաջ գտնւում էր վրացի զիւղացիների մի խումբ: Նրանցից երկուսը, Դաթիկօն ու Դիոն վիճում էին, և ինչպէս վերջն իմացանք, նրանք տարբեր զիւղերից էին և երկուսն էլ յայտնի «չայրի» ասողներ էին: «Շայրի» նշանակում է սարսափելի հսցհոյանքներից ու յիշոցներից հիւսած (մեծ մասամբ) երկու նախադասութիւն, որոնք վերջանում են ոտանաւորի ձևով:

Եթէ «չայրի» ասողը վանկեր շփոթէ, կամ ոտը չբերէ, նա հանդիսականների կողմից ծաղրի

կենթարկուի և վէճի ժամանակ յաղթուած կը ծանաչուի: «Շայրի» ասողը ձգտում է որ իր ասածը լինի սրամիտ, շնորհալի և միևնոյն ժամանակ համապատասխան իր հակառակորդի ասածին:

—Շարունակեցէք, Դաթիկօ, Գիօ, ահա սրանք էլ թող դատաւորներ լինեն, մեզ վրայ ցոյց տալով ասեց դուքանի տէր Միխակը,—[Թող սրանք որոշեն, թէ ով կը յաղթէ կամ կը յաղթուի:

Յետոյ դարձաւ մեր կողմը և փսփսաց մեր ականջին հայերէն. «լաւ լսեցէք, երկուսն էլ հռչակուած են»:

—Թող լինեն դատաւոր, ես համաձայն եմ, ասաց Դաթիկօն և ուսերով մի տեսակ շարժումն գործեց:

—Ինձ համար միևնոյն է, աւելացրեց անտարբեր կերպով Գիօն, [Թող սրանք լինեն արդարադատներ. եթէ յաղթուեմ էլ՝ ինձ ներելի է, ծերացել եմ, յիշողութիւնս դաւաճանում է:

Այս ասելով նա նստեց ծալապատիկ, հանեց ոտի վրայից մաշուած տրեխը, միջից դուրս թափեց հողի փշրանք ու նորից հազաւ:

—Նստեցէք, տղերք, նստեցէք, ասաց հրամայական ձևով Միխակը, որ անշուշտ հեղինակութիւն էր վայելում ամբոխի աչքում:

Մի ակնթարթում բոլորեքեան, ժպիտները երեսին, նստեցին զեանի վրայ և լարեցին իրանց ուշադրութիւնը: Ականջները կտրած հովուական սպիտակ Գամփոք մօտեցաւ կոտրած սայլից ընկած ստուերին ու միւննոյն տեղի վրայ մի երկու պտոյտ անելուց յետոյ պառկեց ու կարծես իսկոյն քնեց:

Տիրեց լռութիւն:

Դաթիկօն յօնքերը կիտեց, մի վայրկեան խորասուզուեց մտքերի մէջ ու համարձակ կերպով ուզղեց մի «շայրի» իր հակառակորդին: Հանդիսականներից միքանիսը ժպտացին, իսկ մէկը բացականչեց «վայ դէղաշէնս» (վայ քո մօր):

Գիօն անխռով դէմքով պատասխանեց զարմանալի ներդաշնակութեամբ, իսկ որ ամենազնահատելին էր, այնպէս ձևակերպեց իր «շայրին», որ ուղղակի ամօթալի համարեց Դաթիկոյի ասածը և նախատեց տգիտութեան համար, որ այդպիսի անշնորք բաներ չէ կարելի արտասանել պատուական հասարակութեան մէջ:

Մենք ամենքս հիացանք և չգիտեմ ինչու ամենքս էլ միաժամանակ շարժուեցինք մեր տեղերից: Մի երիտասարդ, ըստ Լրևոյթին սայլապան, ուրախութիւնից վեր թռաւ տեղից, մի փոքր թռչկոտեց ու նորից նստեց իր տեղը: Իսկ Միխակը եր-

կու ձեռքով ականջները ծածկեց ու՝ օհ, օհ օհ բացականչելով ներս վազեց դուքան: Սպիտակ Գամփոր բարձրացրեց զլուխը, նայեց այս ու այն կողմ և երբ տեսաւ, թէ այդ բանը իրան չի վերաբերում, նորից աչքերը խփեց ու քուն մտաւ:

Այս երկու հերոսները քառորդ ժամի չափ անընդհատ միմեանց հիւրասիրեցին զրջով աննկարագրելի յիշոցների կուտակներով: Ընկերս՝ որ տեղացի չէր, շատ քիչ բան էր հասկանում այս բանից, իսկ ես մեծ ուշադրութեամբ հետևում էի գործի ընթացքին և ցաւում էի՝ հէնց սկզբից ներկայ չլինելու համար:

Բոլոր ժամանակ աչքի էր ընկնում Գիօյի առաւելութիւնն ու գերազանցութիւնը: Նրա ամեն մի «շայրին» ինքնուրոյն էր և ներդաշնակ: Արտասանում էր ոգևորուած ու զիտակցարար: Իսկ Գաթիկօն անդիր էր արել զանազան ժամանակներում լսած շայրիներ: Ոչ մինը իր սեփական մտքի ծնունդ չլինելով, դուրս էր տալիս մեքենայաբար:

Վէճի ամենատաք միջոցին Գիօն ուղղեց սովորականից դուրս մի ընդարձակ շայրի, որի մէջ յիշեց հակառակորդի թէ ծնողներին, թէ մօտիկ ու հեռու ազգականներին, թէ կնքահօրը, թէ սանահօրն ու սանամօրը, թէ ծանօթ ու հարևանին, թէ



նրանց մեռելիների համար դազաղ շինողներին ու դե-  
րեղման փորողներին և այլ այլն: Հանդիսականների  
մեծամասնութեան ուրախութիւնը դազաթնակէտին  
հասաւ: Հակառակորդը իր համազիւղացիների հետ  
միասին միմիայն հեղնօրէն ժպտացին և սկսեցին  
հանդարտեցնել ամբօխը: Դաթիկօն անմիջապէս պա-  
տասխանեց նոյնպէս ընդարձակ և բաւական լաւ  
շայրով, բայց իսկոյն բողոքեցին ամեն կողմից՝ «այդ  
արդէն ասացիր սկզբում... կրկնել չի կարելի» և այլն:  
Դաթիկօն զայրութից կարծրած խրպոտ ձայնով իս-  
կոյն արտասանեց մի ուրիշ շայրի և շտապով վեր-  
կացաւ տեղից:

— Այ մուրտար շուն— այ էշ, աւանակ... Տղերք,  
լսեցի՞ք, կնոջ (Գիոյի ամուսնու) անուն յիշեց,  
լսուեց ամեն կողմից և իսկոյն շփոթն ընկաւ ամ-  
բօխի մէջ ու իրար խառնուեցին: Սկսեցին միաժա-  
մանակ գոռալ, հայհոյել, նախատել, բայց պարզ բան  
չէր հառկացուում, թէ ո՞վ ինչ էր ուզում կամ ասում:  
Վերջը բոլորեքեան երեսները դարձրին մեր կողմը և  
դատաստան խնդրեցին: Թէպէտ խօսքերը չէին հաս-  
կացուում, բայց ձևերից ու շարժուածքներից երե-  
ւում էր, որ հարցնում էին մեզ թէ արդեօք ունէ՞ր  
Դաթիկօն իրաւունք յիշել Գիոյի կնոջ անունը: Ես  
վճիրս ուզեցի յայանել, բայց դեռ մի հարց պէտք

է առաջարկէի, թէ արդեօք նրանք պայմանաւորուել էին վէճ սկսելուց առաջ կնոջ անուն յիշել կամ չյիշել: (Սյսպիսի դէպքերում շատ յաճախ պայմանաւորուած են): Երբ ես այս մտածմունքի մէջ էի, Գաթիկոն դուրս պրծաւ ամբօխի միջից ու սանձարձակ ձայնով բացազանչեց՝ «Թո՛ղ կորչեն նրանք» և այլն: Ահա՛ նրա մեր հասցէին ուղղած բառերի ամենաքաղաքավարի թարգմանութիւնը: Սյս ասելով ձեռքով դաշոյնի կոթից ամուր բռնած հեռացաւ մեզանից: Նրան հետեւեցին չորս-հինգ հոգի, երեւի իր կողմնակիցներ, որոնք անընդհատ շուռ էին գալիս, հայհոյում էին մեզ ամենքիս ու դարձեալ շարունակում ծանապարհը, մինչև վերջապէս անհետացան:

Տխուր վախճանը ծանր տպաւորութիւն գործեց վրաս: Շատ ցաւեցի Գիոյի համար: Խեղճ Գիօն լուռ էր, միայն մի-մի անգամ ասում էր համեստ ու յոգնած ձայնով՝ «Լաճիբակի հետ չպէտք է վէճի դուրս գայի»:

Վերջապէս ամեն ինչ հանդարտուեց և մենք նստեցինք ծաշի: Ընկերս դուրս գնաց ու Գիոյի փելից բռնած ներս բերեց մեզ մօտ, ուր նրա համար եռօտանի կոպիտ աթոռ էինք պատրաստելու նաչուղեց նստել մեզ հետ, ընդունեց մեզանից միմիայն

մի բաժակ օղի ու փոքրիկ պատառ հաց ու շնոր-  
հակալութիւն յայտնելով՝ շալակեց ուսին իր հին  
խուրջինն ու գնաց:

\*

Դեռ արևը մայր չէր մտած, երբ մօտեցանք  
ձիաւուրի անտառին: Բաւական ժամանակ ընթա-  
նալուց յետոյ իմ չիրած պօստի ճանապարհի վրայ  
վերջապէս փոխոււմ ենք մեր ընթացքը և մի նեղ  
շաւղի միջով դիմոււմ ենք դէպի անտառի խորքը:  
Տեսակ-տեսակ թփերի փշոտ ծիւղերը արգելք են լի-  
նոււմ մեզ հանդիստ մնալ ձիու վրայ. երբեմն-երբեմն  
կարծես ընկնոււմ ենք հարիւրաւոր կատուների ճան-  
կերի մէջ, որոնք անխնայ շանդրոտոււմ են մեր մար-  
մինը, փետտոււմ դլխներիս մազերը ու պատռտոււմ  
մեր ամառւայ շորերը: Չնայած որ ձիերը տեղական  
են և սովոր են ամեն տեսակ սատանայական ճա-  
նապարհներով ման գալուն, սակայն նկատելի է նրանց  
տհաճութեամբ քայլելը: Քայլոււմ են դանդաղ ու  
անհաստատ և յայտնի չէ թէ ինչո՞ւ են ամեն բոպէ  
կանգ առնոււմ, նայոււմ աչ, նայոււմ ձախ, կարծես  
բան են որոնոււմ ու դարձեալ շարունակոււմ ճանա-  
պարհը: Երբեմն ընկղմոււմ ենք խաւարի մէջ և մեր  
շուրջը տիրոււմ է ճահճային գարշահոտութիւն, եր-

բեմն բացւում է մեր առաջ Ֆանտաստիկական մի  
աշխարհ, ուր թտփանցում են արևի ճառագայթ-  
ները, բայց ոչ թէ այն սովորական կերպով, ինչպէս  
միշտ տեսնում ենք: Ոչ, սա ուրիշ լոյս է: Անզու-  
թարևի այրող ճառագայթները, անցնելով ծառերի  
բիւրաւոր ծիւղերի միջով ու հանդիպելով անթիւ-  
ռւ անհաշիւ երփներանգ տերևներին՝ մեղմանում են,  
նուազւում են և ապա ամենահեղիկ կերպով զրոշ-  
մում ծաղկալից մակերևոյթի վրայ շրջաններ ու կի-  
սաշրջաններ, եռանկիւնիներ ու քառանկիւնիներ  
«ի՞նչ կախարդական է այս տեսարանը», անցնում  
է մտքովս. ահա՛ Արարչի ստեղծագործութեան ամե-  
նակատարեալը: Ո՞վ կարող է արդեօք մտնել սրա  
գաղտնիքների մէջ, ո՞ւմն է մատչելի սրա լեզուն, ու-  
մի՞ն է բարձրից թոյլ տուած բմբռնելու բնութեան  
հրաշալիքները և թարգման լինելու մեզ՝ հասարակ-  
մահկացուներիս: Ո՞ւր ենք զնում մենք, ի՞նչ տեղ  
ենք զանւում, ո՞րտեղ է ճանապարհը, մի՞թէ կայ  
այստեղ ճանապարհ, — մենք չգիտենք: Լայն ճանա-  
պարհների վրայ, ուր անընդհատ երթևեկութիւն  
կայ, ուր առանց մոլորելու կարողանում ենք զնալ  
քաղաքից քաղաք, գիւղից գիւղ, մենք՝ ձիաւորներս  
սիրում ենք հարուածել մեր ազնիւ անասուններին  
ու ինքնահաւանութեամբ սանձից թափ տալ, սպառ-

նալ ու հայհոյել, իբր թէ նա մոլորւում է, շեղւում է ճանապարհից, իսկ այնպիսի հանդամանքներում, երբ ինքներս ենք մոլորւում՝ մեր ամբողջ յոյսը՝ նոյն անասունների վրայ ենք դնում ու լիովին ապաւինում նրանց բնազդին: Եւ այսպէս, այս բոլորէիս մեր վիճակը մեր ձիերը պէտք է որոշեն և լիայոյս ենք, որ սրանք մեզ չեն կորցնի, այլ դուրս կը բերին մեզ ցանկալի տեղ: Սնցնում են բոլորներ, փոխւում են տեսարաններն անընդհատ: Ահա՛ հաստամարմին ծերունի-կայնին, ի՛նչ ամուր է կանգնել իր տեղը, ի՛նչ ազատօրէն է տարածել իր թուխ բազուկները, ի՛նչ հովանի է արել իր թևերի տակ և ի՛նչ խնամքով է պահպանում հարիւրաւոր մատաղ ժառանգներին, անշուշտ թոռներին: Ահա՛ նրանց մանկական ոտների տակ գեանատարած հանգչում է իրանց նահապետի քայքայւած մարմինը: Ահա՛ նորից զեղեցիկ կանաչազարդ կիսամութ մի անկիւն, ուր երկու սիրահարների նման սղնին ու մասրին իրար վզով են փաթաթուել և այնպէս ամուր, որ կարծես երգուել են յաւիտեան չրաժանուել: Ահա և նրանց փէշերի տակ մօայլ ճահիճ, անձոռնի էակների—գորտերի բնակարան, ուր տեղից նրանք զաղտազոզի դիտում են անմեղ սիրահարներին, երևի զիշերները բամբասելու համար իրանց անտանելի կռկոռոցով: Մենք

շարունակում ենք մեր ուղին: Այժմս պատկերանում է մեր առաջ զանազան բոյսերից, մացառներից ու թփերից հիւսած խառնիճադանճ մի անթափանցելի պատ, որի միջից անցնել չի յանդգնի նոյն իսկ անտառի բնակիչներից ոչ մի էակ: Յուսահատուած ձիւկանգնում է, աչքերը յետ է դարձնում, կարծես տեղեկանալու թէ միայնակ խօ չէ, յետոյ թափ է տալիս գլուխը ու հանդարտ քայլերով դիմում դէպի աջ, բայց է անում տերևախիտ թփերը ու ոտի տակ տալով ամենայն ինչ՝ գնում է առաջ: Մի բոպէից յետոյ զգում եմ թէ ինչպէս փոքր առ փոքր իշնում եմ կարծես անդունդ: Աչքերս փակում եմ, որովհետև անդադար ապտակներ են զարնում երեսիս: Չիս մի վայրկեան կանգ է առնում, կուչ է դալիս և յանկարծ անսպասելի կերպով թռիչք է անում: Եթէ ես ձի նստել սովոր չլինէի, անշուշտ պէտք է վայր ընկնէի: Ընկերս որ հետևում է ինձ՝ ենթարկում է միևնոյն վիճակին, բայց նա փոքր ինչ ինձանից բազդաւոր է այն պատճառով, որ ես վաղօրօք զգուշացնում եմ նրան: Ենթադրում եմ, որ ձիս փոսի վրայից թռաւ: Հիմա աստիճանաբար բարձրանում եմ, բայց դարձեալ նոյն տեսակ թփերի մէջն եմ գտնւում:

\*



—Ես բոլորովին կուրացայ, աղաղակում է ընկերս,— ո՛ւր ենք զնում արդեօք, մենք մոլորւել ենք... Սա ճանապարհորդութիւն չէ, սա տանջանք է...

Օ՛հ, փառք Աստուծուն, Հիմա մի փոքր ազատ կարող ենք շունչ քաշել, աչքերս էլ կարող ենք բաց պահել: Մենք մտել ենք անտառի իսկական խորքը: Նսկայական ծառեր մէկը միւսից դերազանց, միմեանցից շոշափելի հեռաւորութեան վրայ կանգնած են անշարժ: Նրանց դարևոր, սևացած բուները ծածկուել են դիւրեկան կանաչ գոյնի մամուռներով: Մենք գտնւում ենք տարօրինակ կամարների տակ, ուր արևի լոյսը համարեա բոլորովին չէ թափանցում: Մեր շուրջը տիրում է աղչամուղչ: Ենչառութիւնս ծանրացել է, կրճքիցս հազ է առաչանում: Ի՞նչում ենք ձիերից՝ նրանց փոքր ինչ հանդիստ տալու համար, և դարձեալ շարունակում ճանապարհը: Ոտներիս տակ ինչ որ փափկութիւն եմ զգում, կարծես մահիճներ լինեն փռուած: Ամբողջ մակերեւոյթը ծածկուած է միակերպ մռայլ գոյնով, որ տեղից խոնաւութեան հետ միասին դարշելի հոտ է բուրում: Սա անբացատրելի չէ: Սնյիշելի ժամանակներից սկսած իւրաքանչիւր տարի, ձմեռը մօտենարուն պէս, ծառերը տերևաթափ են լինում ու փտում և այս տերևների կուտակներից կազմւում է

փափուկ մակերևոյթ, որի վրայով այս բոստիս անց  
ենք կենում: Չկայ բոյսի նշան ոչ մի տեղ, մեռե-  
լութիւն է տիրում: Մեզ վրայ յարձակուել են մեծ  
բանակութեամբ քաղցած մոծակներ և անխղճօրէն  
ծծում են մեր արիւնը:

Մեր դրութիւնը արդէն անտանելի է դառնում:  
Ո՞ր կողմ պէտք է դնանք, ինքներս էլ չգիտենք: Ար-  
դեօք որեւիցէ ժամանակ եղել է այստեղ կենդանի  
արարած: «Գնանք աչ, գնանք ձախ. այդ միւկնոյն է,  
միայն թէ գնանք հեռանանք այստեղից», կրկնում  
ենք անդադար: Եւ այսպէս դարձեալ շարունակում  
ենք ծանապարհը դէպի աչ կողմ: Միքանի բոստից  
յետոյ միանգամայն ազատուում ենք այդ «մռայլ աշ-  
խարհից» և դուրս ենք գալի մի կանաչադարդ հրա-  
պարակ, ուր այստեղ ու այնտեղ վայրէ խաղողի որ-  
թերը, իրանց օձապտոյտ բուններով բարձրացել են  
ու կաշկանդել կողքին կանգնած մատաղահաս ծա-  
ռերը: Նրապարակի մէջտեղ լուռ ու անձայն հոսում  
է փոքրիկ առուակ: Լոյսը պայծառ է և օդը մա-  
քուր, սակայն մի-մի անգամ անախորժ հոտ է բու-  
րում: Անցնում ենք առուակի վրայից և դիմում ենք  
դէպի առաջ: Այստեղ մեր առաջ մի կանաչադարդ  
թփի տակից աղմուկ ու շփոթ գցելով բարձրանում  
է զիշակեր թռչունների մի երամ: Ակամայ զիտում

եմ այնտեղ և տեսնում եմ մի տխուր տեսարան: Թփի վրայ թելերով կապած արդէն մաշուած մի կտոր թղթի վրայ երևում է երկտող գրութիւն (վրացերէն). «Ես որսորդ Գ... Ս... անդղուշութեամբ սպանեցի իմ հաւատարիմ Ստաւարին» (շան անուն): Նոյն թփի տակ խոտերի միջից երևում է կմախք դարձած «Ստաւարի» դիակը: Վերջապէս այստեղ երևում են ոտի տակ տուած ու արորուած տեղեր, իսկ մի քանի քայլ հեռու պարզ երևում է հարթած նեղ շաւիղ: Այդ շաւղով առաջանում ենք ուրախացած, որ չենք մոլորուել, բայց մերթ ընդհատում, անյայտանում է և մեզ դցում յուսահատութեան մէջ:

— Զի նստենք, ասում է ընկերս, — սրանք մեզանից լաւ կարող են դանել հեռքերը:

Ես համաձայնում եմ: Նստում ենք ձիերի վրայ և բաց թողնում սանձերը: Զիս շուտով որոշում է ծանապարհը և գնում է առաջ, դիպցնելով ինձ աչ ու ձախ ծառերին: Մառերն ու թփերը շուտով վերջանում են և մենք դուրս ենք գալի մի բաւական ընդարձակ ճահճային մակերևոյթի վրայ: Յեկ ու պղտոր ջուր, ուրիշ բան չկայ: Միանգամից տիրում է սրտիս յուսահատութիւն: Զիս կանգ է առնում: Ընկերս նոյնպէս հասնում է ու հառաչում: «Այ քեզ խայտառակութիւն, սրտեղ բերիք դու

ինձ», նախատու՞մ է ինձ լացի ձայնով: Ես ինձ մեղաւոր ճանաչելով լռում եմ: Չգիտեմ ինչօ՛ւ, ստիպում եմ ձիւս մանեղ ցեխերի մէջ: Խեղճ անասունը հնազանդու՞մ է, մանու՞մ ու թաղու՞մ է մինչև ծրնկները: Գիժը ուռցրած նայում է շուրջը և ոտները դժուարութեամբ հանելով՝ դառնում է յեա և քայլերը արագացնելով դիմում է դէպի ձախ:

— Բազում էիր կենդանի թաղուէ՞ր, ծաղրելով հարցնում է ինձ ընկերս:

Ես լռում եմ: Անդիտակցարար մտրակում եմ ու սանձահարում ձիւս: Սա վազում է և հինգ բոսիկից յեաոյ հասնում ենք մի դեղատեսիլ անկիւն, ուր երեք հատ վիթխարի կաղնիներ, երեք հատ իրարից գերազանց գեղեցկուհիների նման հրաշալի խուճր են կազմել: Դրանք կանգնած են մի սիրուն կանաչադարձ հրապարակի վրայ և այս բոլորաձև հրապարակը շրջապատուած է ասղարթախիտ անտառներով, ուղղակի պարսպի նման Արեգակը արդէն մայր է մտնում և իր վերջին ծիրանի ճառագայթներով ներկել է ամենարարձը ծառերի գագաթները: Մենք մօտենում ենք երեք կաղնիներին և առանց միմեանց խօսք ասելու, համարեա միաժամանակ իջնում ենք ձիերից, կարծես վազորօք վրձուած լինէինք անպատճառ այստեղ գիշերելու: Կա-

պուճ էնք ձիւերին զեանից դուրս պրծած ծառերի  
արծաաններից, փռուճ էնք կանաչ խոտերի վրայ մեր  
վերարկուները և գլուխնիս զնկլով խուրչինի վրայ՝  
ձգուճ պառկուճ էնք: Փոքր ժամանակ թմրած լի-  
նելուց յետոյ սթափուճ էմ և մեծ դժուարու-  
թեամբ բարձրանուճ տեղիցս: Մարմինս, մանաւանդ  
ոտներս սաստիկ ծանրացել են, քայլերս հազիւ էմ  
փոխուճ: Ընկերս քուն է մտել: Մեր շուրջը տիրել  
է աղչամուղչ. բնութիւնը ընկղմուել է կիսախափարի  
մէջ, ոչ լոյս է և ոչ մութ: Ամեն տեղ տիրուճ է  
տխրութիւն: Տխուր է և իմ սիրտը: Մարդու հո-  
ղին չի զիմանուճ անորոշ դրութեան: Զարթեցնուճ  
եմ ընկերիս անոյշ ընից և սկսուճ էնք հաւաքել  
վառելիք, որովհետև հարկաւոր է մեզ խարոյկ ամ-  
բողջ զիշերը մինչև լուսարաց: Երկիւղալի է առանց  
կրակի Ֆնալ այսպիսի անտառուճ, ուր ինչպէս լսած  
եմ, գազանների թիւը մեծ է: Ընկերս երկար լու-  
թիւնից յետոյ սկսուճ է պաամել տխուր բաներ,  
յիշուճ է իւր հանդուցեալ մօր վերջին կտակը և  
յանդիմանուճ է ինքն իրան, որ սրբութեամբ չի  
կատարել Յիշուճ է նոյնպէս իր տեսած խառնի-  
խուռն տխուր երազները: Բռնուճ է ձեռքս ու էլ  
բաց չէ թողնուճ: Նկատուճ էմ որ սրան երկիւղ է  
տիրուճ, թէպէտ աշխատուճ է ինձանից ծածկել:

Խեղճ երխտասարդը առաջին անգամն է փորձում  
բնութեան զրկում գիշեր անցկացնել: Կրակ ենք տալի  
չորացած ծառի ճիւղերին և անմիջապէս սաստիկ  
ծուխ է բարձրանում: Մրան հետեւում է վերև ծա-  
ռերի տերեւների մէջ իրարանցում: Մենք օտարներս  
անհանդիստ ենք անում տեղական բնակիչներին—  
անմեղ թռչուններին: Գիշերն իր սև քողը ծածկել  
է ամբողջ աշխարհիս վրայ: Խարոյկը ուժգին բորբոք-  
ւում է և իր շուրջը կարմիր լոյս տարածում: Ըն-  
կերիս դէմքը ուրախութիւն է արտայայտում, լոյսը  
ողևորել է նրան: Սրախօսութիւններ է անում, անեկ-  
ղօաներ պատմում ու ծիծաղում: Ուրախ եմ նոյն-  
պէս և ես: Յանկարծ դադանիքի նման բացւում է,  
որ մենք քաղցած ենք և միմեանց խորհուրդ ենք  
տալի անպատճառ ընթրելու հանում ենք խուրչինի  
միջից մեր համեստ ընթրիքը, նստում ենք խարոյկի  
մօտ և մեծ ախորժակով ուտում: Մի շիշ կարմիր  
գինի ունենք, որ մեզ բոլորովին բաւական է լինում:  
Ինչ սանձարձակ ու անխոհեմ կենացներ ենք առա-  
ջարկում... սա կը սաղի միմիայն անառի խորքում  
և անպատճառ գիշերուայ ժամին: Մեր ծիծաղն ու  
ուրախութիւնը վերջանում է գինու հետ միասին:  
Քնկու ժամանակն էլ արդէն հասել է, բայց հերթով  
պէտք է քնել: Սյս գիշեր հարկաւոր է մի արթուն



պահապանն Վճռում ենք, որ մինչև ժամի երկուսը  
բնկերս քնի, իսկ այնուհետև ես:

Նա պառկելուն պէս քուն է մտնում: Խարոյ-  
կին աւերացնում եմ հաստ փայտեր, որպէսզի եր-  
կար ժամանակ դիմանայ կրակը, իսկ ես անց ու  
դարձ եմ անում մեր հիւրընկալ կաղնիների տակ:  
Բնութիւնը՝ սեւերով զգեստաւորուած, անլրդով ննչել  
է: Տեսարանը մաշյլ է ու անթափանցելի: Նայում  
եմ շուրջս և ամեն տեղ սև տարածութիւն եմ տես-  
նում, իսկ այդ սև տարածութեան մէջ նաև սև ու-  
րուականներ, որոնք անշարժ կանգնած հանդիստ են  
տանում: Զեփիւռի նշան չկայ, երևի նա էլ է քուն  
մտել: Արթուն են ինձ նման ձիերը և անդորրու-  
թեան մէջ արածում են: Արթուն են նոյնպէս ան-  
հանդիստ ծղրիտները, որոնք խաւարի մէջ ծածկուած  
փսփսում են իրար հետ: Արթուն է նոյնպէս և Ալա-  
զանը: Նրա հեռաւոր խուլ հառաչանքը տարած-  
ւում է բնութեան մէջ: Ինչու է արդեօք ցերեկով  
մեռած, անձայն, իսկ զիշերները ողբում: Մութ կա-  
պոյտ երկնակամարի վրայ խումբ-խումբ շարուել են  
շարժուն ու անշարժ, մեծ ու պստիկ աղամանիներ  
և անմեղ ժպիտ երեսներին արծաթեայ փոշի են  
դուրս փչում: Դրանք դեռ երկար կը զուարճանան  
մինչև իրանց թաղուհու երևալը: Աշխատում եմ որ-

քան կարելի է քայլերիս ձայնը անխելի դարձնել,  
 բնութեան սրբազան ներդաշնակութիւնը չխանդա-  
 րելու համար, սակայն իզուր... Մենք այստեղ աւե-  
 լորդ մաս ենք կազմուծւոյ Խարոյկը մերթ բորբոքուած,  
 կատաղուծ է, մերթ նուազուծ և իր անհաւասար  
 լոյսը խաղացնուծ է իր շուրջը: Երկու կտոր մոխ-  
 րադոյն ամպեր համեստութեամբ լողանալով երբեմն  
 մօտենուծ են իրար ու համբուրուծ, երբեմն ձանձ-  
 րանուծ իրարից ու բաժանուծ և այսպէս հանդարտ  
 անցնուծ են երկնակամարի վրայով: Օղբ աստիճա-  
 նարար խոնաւ ու անդիւրեկան է դառնուծ: Տրա-  
 մադրութիւնս փոխուծ է, ձանձրանուծ եմ, քունս  
 յաղթուծ է, բայց չյաղթուելու համար նստուծ եմ  
 խարոյկի մօտ ու քնած ընկերիս գէճքի գծադրու-  
 թիւնը դիտուծ: Թռչուծ են ըոպէները ըոպէների  
 ետեից, սակայն խաւարի միակերպութեան մէջ ոչ  
 մի փոփոխութիւն չէ նկատուծ: Յանկանուծ եմ  
 ի սրտէ, որ ընկերս արթնանայ: Բազդի բերմամբ  
 ձիերի մէջ շփոթ է առաջանուծ, սկսուծ են խր-  
 խրնչալ ու յարձակուել միմեանց վրայ, Ընկերս քնա-  
 թաթախ վեր է թռչուծ տեղից, ապուշի նման նայուծ  
 է վրաս ու անհասկանալի բառեր արտասանուծ:  
 Շուտով ուշքի է դալիս, նայուծ է ժամացոյցին ու  
 առաջարկուծ է ինձ քնել:

Միքանի բոպէից յետոյ քուն եմ ձանուժ և որքան  
ժամանակ է աւուժ այս զրութիւնս՝ չգիտեմ: Երազի  
նման անորոշ կերպով զգում եմ ինչպէս ձարմնիս  
միջով անցնում է և թունդ տաքութիւն, և թունդ  
սառնութիւն: Այս անհանդիսա զրութեան մէջ մի  
ինչ-որ ախորժարուր ձայներ են հասնում ահանցիտ  
Ո՞րակզից են այս ձայները, անկարող է միտքս ինձ  
հաշիւ տար թ՛մբած զրութիւնս կամաց-կամաց բաց-  
ւում է և ես սկսում եմ գիտակցօրէն լսել երգի  
ձայնը: Եղանակը թէպէտ քաղցր, բայց ախուր ու  
սրտամաշ է: Անշուշտ անյաջող սիրահարութիւնից  
տանջուած ասիական մի երաժշտի արտադրութիւն  
է: Երգի բառերը անկարող եմ ճշդութեամբ որոշել,  
բայց ինձ թւում է, որ յուսահատ հայ բանաստեղծի  
բորբոքուած սրտից դուրս հոսած ողբայի երգ է,  
որ ինձ յայտնի է:

Քե՞զ ողբած, ով կոյս, որ սրտիդ խորքում  
Թաղցնում ես սէրդ անթիւ չարերից,  
Որ չարչարւում ես մութ անկիւններում,  
Որ լաց ես լինում ծածուկ ամենից,  
Որ հազիւ երբեմն ահով, երկիւղով  
Տալիս ես համբոյր սիրած աչերիդ,  
Որ ոչ այժմ ունիս օրեր անվրդով  
Եւ ոչ սպաղսյ մօտիկ առաջիդ:

Օ՛, ինչ հրաշալի ներդաշնակութիւն եղանակի  
և բառերի մէջ: Երեւի ինքը, անբաղդ սիրահար—  
բանաստեղծն էլ այս տեսակ է երգել. տխրամած  
հոգւով տխուր ժամերին: Իսկ ես այս բոպէիս մո-  
ռացութեան մէջ ընկղմուած ու շունչս պահած ու-  
ղու՛մ եմ անվերջ լսել այս դիւթական ձայները: Երգը  
շարունակու՛մ է զեղզեղել և տատանուելով մաքուր  
օդի մէջ, նուազու՛մ՝ մարում է.

Ի՞նչ օղբամ ես, կոյս, որ թոյլ ու անզօր  
Ձե՛մ փրկու՛մ քեզի այդ դառն կեանքից,  
Թէպէտ պատառու՛մ է սիրտս ամեն օր,  
Թէև այբում է ինձ ցաւ ու կսկիծ:  
Ես էլ քեզ նման, իբրև մի յանցանք  
Թաղու՛մ եմ ի՞մ մէջ զղացմունք սրախ.  
Ես էլ ոչ հիմա ունեմ խաղաղ կեանք  
Եւ ոչ ապագայ մօտիկ առաջիս:

Երգը ընդհատու՛մ է: Ընդհատու՛մ է և ի՞մ  
կախարդուած դրութիւնս: Սպասու՛մ եմ երգի շա-  
րունակութեան Բաց իղուր: Բաց եմ անու՛մ աչքերս  
և նայում եմ երկնքին, ուր մութ կապուտակու-  
թեան մէջ մաշուած լուսինն իր սուր կղջիւրներով  
փայլում է և իր համեստ շողերը տարածու՛մ աղաս  
րնութեան մէջ: Նրա շուրջ կղած աստղերը չքացել

անյայտացել են Խաւարր վերացել է Լրիբի վրայից՝  
 աեղ տալով բարակ մշուշին: Սառն զեփիւոք օդի  
 մէջ խաղալով քերուծ է երեսու: Մարմինս սառել է  
 և շորերս թրջուել: Անտառի միջից լուծւած է մեղծ  
 սլալոց: Վեր եմ կենուծ աեղիցս ու նստուծ խարոյկի  
 մօտ տաքանայու: Ընկերս նոյնպէս մօտենուծ է ու  
 նստուծ կողքիս, առանց խօսք ասելու, բայց ինձ  
 թուած է, որ ծածկուծ է ինձանից արտուասախառն  
 աչքերը: Անբաղդ երիտասարդ, անշուշտ շատ է յու-  
 դուել նրա սիրտը երգելիս: Գրա կեանքն էլ լի է  
 անյաշող սիրահարական արկածներով:

Լուսինը կամաց-կամաց գալկանուծ է, աստ-  
 զերը իրար ետեւից հանդուծ են, երկնքի կասու-  
 տակը պարզուծ է և ամեն կողմից լուծւած է թրո-  
 չունների ծլվլոց: Սմբողջ բնութիւնն արթնանուծ է  
 քնից, իսկ միակ Ալազանը նոր է քուն մտնուծ, լուծւած:

— Գնանք, շարունակենք մեր ճանապարհը, ար-  
 դէն բացուծ է աղօթարանը:

— Սյո՛, զնանք, ժամանակ է, պատասխան է լի-  
 նուծ ի՞մ կողմից:





### Սիրելի բնթերցող.

Կան անարոյժ վարպետներ, որոնք չունենալով անհրաժեշտ գործիքներ՝ հասարակ դանակով են շինում դանազան մանր—մունր իրեր: Այդ իրերը բնականորաբար մեծ բան չեն լինում, սակայն պէտք են դալիս տան մէջ: Այնպէս էլ գրքոյկս. թէև գրած է շատ աղքատ ու տհաս հայերէն լեզուով, յամենայն դէպս աւելորդ չպէտք է համարել մեր ոչ հարուստ գրողարանի համար:

Բայց եթէ դու «Յիշողութիւններս» կարդայիր առանց ձանձրանալու, այդ ինձ համար մեծ վարձատրութիւն է:

Գ. Բ.



